

四庫全書

史部

欽定四庫全書

史部

通志卷六上

詳校官侍讀_臣陳萬青

編修_臣裴謙覆勘

覆校官助教_臣金學詩

校對官中書_臣張 塤

謄錄舉人_臣汪元亮

欽定四庫全書

通志卷六上

宋 右廸功郎 鄭樵 漁仲 撰

後漢紀第六上

光武 明帝 章帝 和帝 殤帝 安帝

世祖光武皇帝諱秀字文叔南陽蔡陽人高祖九世之
孫也出自景帝生長沙定王發發生舂陵節侯買買生
鬱林太守外外生鉅鹿都尉回回生南頓令欽欽生光

武光武年九歲而孤養於叔父良身長七尺三寸美須眉大口隆準日角性勤於稼穡而兄伯升好俠養士常非笑光武事田業比之高祖兄仲王莽天鳳中乃之長安受尚書略通大義莽末天下連歲災蝗寇盜鋒起地皇三年南陽荒饑諸家賓客多為小盜光武避吏新野因賣穀於宛宛人李通等以圖讖說光武云劉氏復起李氏為輔光武初不敢當然獨念兄伯升素結輕客必舉大事且王莽敗亡已兆天下方亂遂與定謀於是乃

市兵弩十月與李通從弟軼等起於宛時年二十八十一月有星孛於張光武遂將賓客還春陵時伯升已會衆起兵初諸家子弟恐懼皆亡逃自匿曰伯升殺我及見光武絳衣大冠皆驚曰謹厚者亦復為之乃稍自安伯升於是招新市平林兵與其帥王鳳陳牧西擊長聚光武初騎牛殺新野尉乃得馬進屠唐子鄉又殺湖陽尉軍中分財物不均衆恚恨欲反攻諸劉光武斂宗人所得物悉以與之衆乃悅進拔棘陽與王莽前隊大夫

甄阜屬正梁邱賜戰於小長安漢軍大敗還保棘陽

更始元年正月甲子朔漢軍復與甄阜梁邱賜戰於泚水西大破之斬阜賜伯升又破王莽納言將軍嚴尤秩宗將軍陳茂於涇陽進圍宛城二月辛巳立劉聖公為天子以伯升為大司徒光武為太常偏將軍三月光武別與諸將徇昆陽定陵鄧皆下之多得牛馬財物穀四十萬斛轉以饋宛下莽聞阜賜死漢帝立大懼遣大司徒王尋大司空王邑將兵百萬其甲士四十二萬人五

月到潁川復與嚴尤陳茂合初光武為舂陵侯家訟逋
租於尤尤見而奇之及是時城中出降尤者言光武不
取財物但會兵計策尤笑曰是美須眉者邪何為乃如
是初王莽徵天下能為兵法者六十三家數百人並以
為軍吏選練武衛招募猛士旌旗輜重千里不絕有長
人巨無霸長一丈大十圍以為壘尉又驅諸猛獸虎豹
犀象之屬以助威武自秦漢出師之盛未嘗有也光武
將數千兵徼之於陽關諸將見尋邑兵盛反走馳入昆

陽皆惶怖憂念妻孥欲散歸諸城光武議曰今兵穀既少而外寇彊大并力禦之功庶可立如欲分散勢無俱全且宛城未拔不能相救昆陽即破一日之間諸部亦滅矣今不同心膽共舉功名反欲守妻子財物邪諸將怒曰劉將軍何敢如是光武笑而起會候騎還言大兵且至城北軍陳數百里不見其後諸將遽相謂曰更請劉將軍計之光武復為圖畫成敗諸將憂迫皆曰諾時城中唯有八九千人光武乃使成國上公王鳳廷尉大

將軍王常留守夜自與驃騎大將軍宗佻五威將軍李軼等十三騎出城南門於外收兵時莽軍到城下者且十萬光武幾不得出既至鄆定陵悉發諸營兵而諸將貪惜財貨欲分留守之光武曰今若破敵珍瑤萬倍大功可成如為所敗首領無餘何財物之有衆乃從嚴尤說王邑曰昆陽城小而堅今假號者在宛亟進大兵彼必奔走宛敗昆陽自服邑曰吾昔以虎牙將軍圍翟義坐不生得以見責讓今將百萬之衆遇城而不能下何

謂邪遂圍之數十重列營百數雲車十餘丈瞰臨城中
旗幟蔽野埃塵連天鉦鼓之聲聞數百里或為地道衝
輶撞城積弩亂發矢下如雨城中負戶而汲王鳳等乞
降不許尋邑自以為功在漏刻意氣甚逸夜有流星墜
營中晝有雲如壞山當營而隕不及地尺而散吏士皆
厭伏六月己卯光武遂與營部俱進自將部騎千餘前
去大軍四五里而陳尋邑亦遣兵數千合戰光武奔之
斬首數十級諸部喜曰劉將軍平生見小敵怯今見大

敵勇甚可怪也且復居前請助將軍光武復進尋邑兵却諸將共乘之斬首數百千級連勝遂前時伯升拔宛已三日而光武尚未知乃僞使持書報城中云宛下兵到而陽墮其書尋邑得之不意諸將既經累捷膽氣益壯無不一當百光武乃與敢死者三千人從城西水上衝其中堅尋邑陳亂乘銳崩之遂殺王尋城中亦鼓譟而出中外合勢震呼動天地莽兵大潰走者相騰踐奔殪百餘里間會大雷風屋瓦皆飛雨下如注渚川盛溢

虎豹皆股戰士卒爭赴溺死者以萬數水為不流王邑
嚴尤陳茂輕騎乘死人度水逃去盡獲其軍實輜重車
甲珍寶不可勝算舉之連月不盡或燔燒其餘光武因
復徇下潁陽會伯升為更始所害光武自父城馳詣宛
謝司徒官屬迎弔光武光武難交私語深引過而已未
嘗自伐昆陽之功又不敢為伯升服喪飲食言笑如平
常更始以是慙拜光武為破虜大將軍封武信侯九月
庚戌三輔豪傑共誅王莽傳首詣宛更始將北都洛陽

以光武行司隸校尉使前整修官府於是置僚屬作文
移從事司察一如舊章時三輔吏士東迎更始見諸將
過皆冠幘而服婦人衣諸子繡襦莫不笑之或有畏而
走者及見司隸僚屬皆歡喜不自勝老吏或垂泣曰不
圖今日復見漢官威儀由是識者皆屬心焉及更始至
洛陽乃遣光武以破虜將軍行大司馬十月持節北度
河鎮慰州郡所到郡縣輒見二千石長吏三老官屬下
至佐史考察黜陟如州牧故事輒平遣囚徒除王莽苛

政復漢官名吏人喜悅爭持牛酒迎勞進至邯鄲故趙
繆王子林說光武曰赤眉今在河東但決水灌之百萬
之衆可使為魚光武不答去之真定林於是乃詐以卜
者王郎為武帝子子興十二月立郎為天子都邯鄲遂
遣使者降下郡國

二年正月光武以王郎新盛乃北徇薊王郎移檄購光
武十萬戶而故廣陽王子劉接起兵薊中以應郎城內
擾亂轉相驚恐言邯鄲使者方到二千石以下皆出迎

於是光武趣駕南轅晨夜不敢入城邑舍食道傍至饒陽官屬皆乏食光武乃自稱邯鄲使者入傳舍傳吏方進食從者饑爭奪之傳吏疑其偽乃椎鼓數十通紹言邯鄲將軍至官屬皆失色光武升車欲馳既而懼不免徐還坐曰請邯鄲將軍入久乃駕去傳中人遙語門者閉之門長曰天下詎可知而閉長者乎遂得南出晨夜兼行蒙犯霜雪天時寒面皆破裂至虜汜河無船適遇水合得過未畢數騎而陷進至下博城西惶惑不知所

之有白衣老父在道傍指曰努力信都郡為長安守去
此八十里光武即馳赴之信都太守任光開門出迎世
祖因發旁縣得四千人先擊堂陽貫縣皆降之王莽和
戎卒正邳彤亦舉郡降又昌城人劉植宋子人耿純各
率宗親子弟據其縣邑以奉光武於是北降下曲陽衆
稍合樂附者至有數萬人復北擊中山拔盧奴所過發
奔命兵移檄邊部共擊邯鄲郡縣還復響應南擊新市
真定元氏防子皆下之因入趙界時王郎大將李育屯

栢人漢兵不知而進前部偏將朱浮鄧禹為育所破亡
失輜重光武在後聞之收浮禹散卒與育戰於郭門大
破之盡得其所獲育還保城攻之不下於是引兵拔廣
阿會上谷太守耿況漁陽太守彭寵各遣其將吳漢寇
恂等將突騎來助擊王郎更始亦遣尚書僕射謝躬討
郎光武因大饗士卒遂東圍鉅鹿王郎守將王饒堅守
月餘不下郎遣將倪宏劉奉率數萬人救鉅鹿光武逆
戰於南緣斬首數千級四月進圍邯鄲連戰破之五月

甲辰拔其城誅王郎收文書得吏人與郎交關謗毀者
數千章光武不省會諸將軍燒之曰令反側子自安更
始遣侍御史持節立光武為蕭王令悉罷兵詣行在所
光武辭以河北未平不就徵自是始貳於更始是時長
安政亂四方背叛梁王劉永擅命睢陽公孫述稱王巴
蜀李憲自立為淮南王秦豐自號楚黎王張步起琅邪
董憲起東海延岑起漢中田戎起夷陵並置將帥侵略
郡縣又別號諸賊銅馬大彤高湖重連鐵脰大搶尤來

上江青犢五校檀鄉五幡五樓富平獲索等各領部曲
衆合數百萬人所在寇掠光武將擊之先遣吳漢北發
十郡兵幽州牧苗曾不從漢遂斬曾而發其衆秋光武
擊銅馬於鄴吳漢將突騎來會清陽賊數挑戰光武堅
營自守有出鹵掠者輒擊取之絕其糧道積月餘日賊
食盡夜遁去追至館陶大破之受降未盡而高湖重連
從東南來與銅馬餘衆合光武復與大戰於蒲陽悉破
降之封其渠帥為列侯降者猶不自安光武知其意勅

令各歸營勒兵乃自乘輕騎案行部陳降者更相語曰
蕭王推赤心置人腹中安得不投死乎由是皆服悉將
降人分配諸將衆遂數十萬故關西號光武為銅馬帝
赤眉別帥與大彤青犢十餘萬衆在射犬光武進擊大
破之衆皆散走使吳漢岑彭襲殺謝躬於鄴青犢赤眉
賊入函谷關攻更始光武乃遣鄧禹率六裨將引兵而
西以乘更始赤眉之亂時更始使大司馬朱鮪舞陰王
李軼等屯洛陽光武亦令馮異守孟津以拒之

建武元年春正月平陵人方望立前孺子劉嬰為天子
更始遣丞相李松擊斬之光武北擊尤來大搶五幡於
元氏追至右北平連破之又戰於順水北乘勝輕進反
為所敗賊追急短兵接光武自投高岸遇突騎王豐下
馬授光武光武撫其肩而上顧笑謂耿弇曰幾為虜嗤
弇頻射却賊得免士卒死者數千人散兵歸保范陽軍
中不見光武或云已沒諸將不知所為吳漢曰卿曹努
力王兄子在南陽何憂無主衆恐懼數日乃定賊雖戰

勝而素懾大威客主不相知夜遂引去大軍復進至安次與戰破之斬首三千餘級賊入漁陽乃遣吳漢率耿弇陳俊馬武等十二將軍追戰於潞東及平谷大破滅之朱鮪遣討難將軍蘇茂攻溫馮異寇恂與戰大破之斬其將賈彊於是諸將議上尊號馬武先進曰天下無主如有聖人承敝而起雖仲尼為相孫子為將猶恐無能有益反水不收後悔無及大王雖執謙退太宗廟社稷何宜且還薊即尊位乃議征伐今此誰賊而馳騫擊

之乎光武驚曰何將軍出是言可斬也武曰諸將盡然
光武使出曉之乃引軍還至薊夏四月公孫述自稱天
子光武從薊還過范陽命收葬吏士至中山諸將復上
奏曰漢遭王莽宗廟廢絕豪傑憤怒兆人塗炭王與伯
升首舉義兵更始因其資以據帝位而不能奉承大統
敗亂綱紀盜賊日多羣生危蹙大王初征昆陽王莽自
潰後拔邯鄲北州弭定三分天下而有其二跨州據土
帶甲百萬言武力則莫之敢抗論文德則無所與辭臣

聞帝王不可以久曠天命不可以謙拒惟大王以社稷
為計萬姓為心光武又不聽行到南平棘諸將復固請
之光武曰寇賊未平四面受敵何遽欲正號位乎諸將
且出耿純進曰天下士大夫捐親戚棄土壤從大王於
矢石之間者其計固望其攀龍鱗附鳳翼以成其所志
耳今功業即定天人亦應而大王留時逆衆不正號位
純恐士大夫望絕計窮則有去歸之思無為久自苦也
大衆一散難可復合時不可留衆不可逆純言甚誠切

光武深感曰吾將思之行至鄣光武先在長安時同舍
生彊華自關中奉赤伏符曰劉秀發兵捕不道四夷雲
集龍鬪野四七之際火為主羣臣因復奏曰受命之符
人應為大萬里合信不議同情周之白魚曷足比焉今
上無天子海內淆亂符瑞之應昭然著聞宜答天神以
塞羣望光武於是命有司設壇場於鄣南千秋亭五成
陌六月己未即皇帝位燔燎告天禋於六宗望於羣神
其祝文曰皇天上帝后土神祇眷顧降命屬秀黎元為

人父母秀不敢當羣下百辟不謀同辭咸曰王莽篡位
秀發憤興兵破王尋王邑於昆陽誅王郎銅馬於河北
平定天下海內蒙恩上當天地之心下為元元所歸識
記曰劉秀發兵捕不道卯金修德為天子秀猶固辭至
於再至於三羣下僉曰皇天大命不可稽留敢不敬承
於是建元為建武大赦天下改鄡為高邑是月赤眉立
劉盆子為天子甲子前將軍鄧禹擊更始定國公王匡
於安邑大破之斬其將劉均秋七月辛未拜前將軍鄧

禹為大司徒丁丑以野王令王梁為大司空壬午以大將軍吳漢為大司馬偏將軍景丹為驃騎大將軍大將軍耿弇為建威大將軍偏將軍蓋延為虎牙大將軍偏將軍朱祐為建義大將軍中堅將軍杜茂為大將軍時宗室劉茂自號厭新將軍率衆降封為中山王己亥幸懷遣耿弇率彊弩將軍陳俊軍五社津備滎陽以東使吳漢率朱祐及廷尉岑彭執金吾賈復揚化將軍堅鐔等十一將軍圍朱鮪於洛陽八月壬子祭社稷癸丑祠

高祖太宗世宗於懷宮進幸河陽更始廩邱王田立降
九月赤眉入長安更始奔高陵辛未詔曰更始破敗棄
城逃走妻子裸袒流冗道路朕甚愍之今封更始為淮
陽王吏人敢有賊害者罪同大逆甲申以前高密令卓
茂為太傅辛卯朱鮪舉城降冬十月癸丑車駕入洛陽
幸南宮却非殿遂定都焉遣岑彭擊荊州羣賊十一月
甲午幸懷劉永自稱天子十二月丙戌至自懷赤眉殺
更始而隗囂據隴右盧芳起安定破虜大將軍叔壽擊

五校賊於曲梁戰歿

二年春正月甲子朔日有食之大司馬吳漢率九將軍擊檀鄉賊於鄴東大破降之庚辰封功臣皆為列侯大國四縣餘各有差詔以顯效未酬名籍未立者大鴻臚趣上朕將差而錄之博士丁恭議曰古帝王封諸侯不過百里今封諸侯四縣不合法制帝曰古之亡國皆以亡道未嘗聞功臣地多而滅亡者乃遣謁者即授印綬壬午更始復漢將軍鄧烜輔漢將軍于匡降皆復爵位

壬子起高廟建社稷於洛陽立郊兆於城南始正火德
色尚赤是月赤眉焚西京宮室發掘園陵寇掠關中大
司徒鄧禹入長安遣府掾奉十一帝神主納於高廟真
定王楊臨邑侯讓謀反遣前將軍耿純誅之二月己酉
幸修武大司空王梁免壬子以太中大夫宋弘為大司
空遣驃騎大將軍景丹率征虜將軍祭遵等二將軍擊
弘農賊破之因遣祭遵圍蠻中賊張滿漁陽太守彭寵
反攻幽州牧朱浮於薊延岑自稱武安王於漢中辛卯

至自修武三月乙未大赦天下詔頃獄多寃人用刑深刻朕甚愍之其於中二千石諸大夫博士議郎議省刑法遣執金吾賈復率二將軍擊更始郾王尹遵破降之驍騎將軍劉植擊密賊戰歿遣虎牙大將軍蓋延率四將軍伐劉永夏四月圍永於睢陽更始將蘇茂殺淮陽太守潘蹇而附劉永甲午封叔父良為廣陽王兄子章為太原王章弟興為魯王舂陵侯嫡子祉為城陽王五月庚辰封更始元氏王歙為泗水王故真定王楊子德

為真定王周後姬常為周承休公癸未詔曰民有嫁妻
賣子欲歸父母者恣聽之敢拘執論如律六月戊戌立
貴人郭氏為皇后子彊為皇太子大赦天下增郎謁者
從官秩各一等丙子封宗子劉終為淄川王秋八月帝
自將征五校丙辰幸內黃大破五校於葦陽降之遣游
擊將軍鄧隆救朱浮與彭寵戰於潞隆軍敗績蓋延拔
睢陽劉永奔譙破虜將軍鄧奉據涇陽反九月壬戌至
自內黃驃騎大將軍景丹薨延岑大破赤眉於杜陵關

中飢民相食冬十一月以廷尉岑彭為征南大將軍率
八將軍討鄧奉於堵鄉銅馬青犢尤來餘賊共立孫登
為天子於上郡登將樂元殺登以其衆五萬餘人降遣
偏將軍馮異代鄧禹伐赤眉使太中大夫伏隆持節安
輯青徐二州招張步降之十二月戊午詔曰惟宗室列
侯為王莽所廢先靈無所依歸朕甚愍之其竝復故國
若侯身已歿屬所上其子孫見名尚書封拜是歲蓋延
等大破劉永於沛西初王莽末天下旱蝗黃金一觔易

粟一斛至是野穀旅生麻赤尤盛野蠶成繭被於山阜
人收其利焉

三年春正月甲子以偏將軍馮異為征西大將軍杜茂
為驃騎大將軍大司徒鄧禹及馮異與赤眉戰於回溪
禹異敗績征虜將軍祭遵破蠻中斬張滿辛巳立皇考
南頓君已上四廟壬午大赦天下閏月乙巳大司徒鄧
禹免馮異與赤眉戰於崤底大破之餘衆南向宜陽帝
自將征之己亥幸宜陽甲辰親勒六軍大陳戎馬大司

馬吳漢精卒當前中軍次之驍騎武衛分陳左右赤眉望見震怖遣使乞降丙午赤眉君臣面縛奉高皇帝璽綬詔以屬城門校尉戊申至自宜陽己酉詔曰羣盜縱橫賊害元元盆子竊尊號亂惑天下朕奮兵討擊應時崩解十餘萬衆束手降服先帝璽綬歸之王府斯皆祖宗之靈士人之力朕曷足以享斯哉其擇吉日祠高廟賜天下長子當為父後者爵人一級二月己未祠高廟受傳國璽劉永立董憲為海西王張步為齊王步殺光

祿大夫伏隆反帝幸懷遣吳漢率二將軍擊青犢於軹
西大破降之三月壬寅以大司徒司直伏湛為大司徒
彭寵陷薊城寵自立為燕王帝自將征鄧奉幸堵陽夏
四月大破鄧奉於小長安斬之馮異與延岑戰於上林
破之吳漢率七將軍與劉永將蘇茂戰於廣樂大破之
虎牙大將軍蓋延圍劉永於睢陽五月己酉車駕還宮
乙卯晦日有蝕之六月壬戌大赦天下耿弇與延岑戰
于穰大破之秋七月征南大將軍岑彭率三將軍伐秦

豐戰於黎邱大破之獲其將蔡宏庚辰詔曰吏不滿六
百石下至墨綬長相有罪先請男子八十以上十歲以
下及婦人從坐者自非不道詔所名捕皆不得繫當驗
問者即就驗女徒雇山歸家蓋延拔睢陽獲劉永而蘇
茂周建立永子紆為梁王冬十月壬申幸春陵祠園廟
因置酒舊宅大會故人父老十一月乙未至自春陵涿
郡太守張豐反是歲李憲自稱天子西州大將軍隗囂
奉奏建義大將軍朱祐率祭遵與延岑戰於東陽斬其

將張成

四年春正月甲申大赦天下二月壬子幸懷壬申至自
懷遣右將軍鄧禹率二將軍與延岑戰於武當破之夏
四月丁巳幸鄴己巳進幸臨平遣大司馬吳漢擊五校
賊於箕山大破之五月進幸元氏辛巳進幸盧奴遣征
虜將軍祭遵率四將軍討張豐於涿郡斬豐六月辛亥
車駕還宮七月丁亥幸譙遣捕虜將軍馬武偏將軍王
霸圍劉紆於垂惠董憲將賁休以蘭陵城降憲圍之虎

牙大將軍蓋延率平狄將軍龐萌救賁休不克蘭陵為
憲所陷秋八月戊午進幸壽春太中大夫徐憚擅殺臨
淮太守劉度憚坐誅遣揚武將軍馬成率三將軍伐李
憲九月圍憲於舒冬十月甲寅車駕還宮太傅卓茂薨
十一月丙申幸宛遣建義大將軍朱祐率二將軍圍秦
豐於黎邱十二月丙寅進幸黎邱是歲征西大將軍馮
異與公孫述將程焉戰於陳倉破之

五年春正月癸巳車駕還宮二月丙午大赦天下捕虜

將軍馬武偏將軍王霸拔垂惠乙丑幸魏郡壬申封殷
後孔安為殷紹嘉公彭寵為其蒼頭所殺漁陽平大司
馬吳漢率建威大將軍耿弇擊富平獲索賊於平原大
破降之復遣耿弇率二將軍討張步三月癸未徙廣陽
王良為趙王始就國平狄將軍龐萌反殺楚郡太守孫
萌而東附董憲遣征南大將軍岑彭率二將軍伐田戎
於津鄉大破之夏四月旱蝗河西大將軍竇融始遣使
貢獻五月丙子詔曰久旱傷麥秋種未下朕甚憂之將

殘吏未勝獄多冤結元元愁恨感動天氣乎其令中都
官三輔郡國出繫囚罪非犯殊死一切勿案見徒免為
庶人務進柔良退貪酷各正厥事焉六月建義大將軍
朱祐拔黎邱獲秦豐而龐萌蘇茂圍桃城帝時幸蒙因
自將征之先理兵任城乃進救桃城大破萌等秋七月
丁丑幸沛祠高原廟詔修復西京園陵進幸湖陵征董
憲又幸蕃遂攻董憲於昌慮大破之八月己酉進幸郟
留吳漢攻劉紆董憲等車駕轉徇彭城下邳吳漢拔郟

獲劉紆漢進圍董憲龐萌於朐冬十月還幸魯使大司
空祠孔子耿弇等與張步戰於臨淄大破之帝幸臨淄
進幸劇張步斬蘇茂以降齊地平初起太學車駕還宮
幸太學賜博士弟子各有差十一月壬寅大司徒伏湛
免尚書令侯霸為大司徒十二月盧芳自稱天子於九
原西州大將軍隗囂遣子恂入侍交趾牧鄧讓率七郡
太守遣使奉貢詔復濟陽二年徭役是歲野穀漸少田
畝益廣焉

六年春正月丙辰改春陵鄉為章陵縣世世復徭役比
豐沛無有所與辛酉詔曰往歲水旱蝗蟲為災穀價騰
踊人用困乏朕惟百姓無以自贍惻然愍之其命郡國
有穀者給稟高年鰥寡孤獨及篤癯無家屬貧不能自
存者如律二千石勉加循撫無令失職揚武將軍馬成
等拔舒獲李憲二月大司馬吳漢拔朐獲董憲龐萌山
東悉平諸將還京師置酒賞賜三月公孫述遣將任滿
寇南郡夏四月丙子幸長安始謁高廟遂有事十一陵

遣虎牙大將軍蓋延等七將軍從隴道伐公孫述五月
己未至自長安隗囂反蓋延等因與囂戰於隴坻諸將
敗績辛丑詔曰惟天水隴西安定北地吏人為隗囂所
誑誤者又三輔遭難赤眉有犯法不道者自殊死以下
皆赦除之六月辛卯詔曰夫張官置吏所以為人也今
百姓遭難戶口耗少而縣官吏職所置尚繁其令司隸
州牧各實所部省減吏員縣國不足置長吏可并合者
上大司徒大司空二府於是條奏并省四百餘縣吏職

減損十置其一代郡太守劉興擊盧芳將賈覽於高柳
戰歿初樂浪人王調據郡不服秋遣樂浪太守王遵擊
之郡吏殺調降遣前將軍李通率二將軍與公孫述將
戰於西城破之夏蝗秋九月庚子赦樂浪謀反大逆殊
死以下丙寅晦日有食之冬十月丁丑詔曰吾德薄不
明寇賊為害彊弱相陵元元失所詩云日月告凶不用
其行永念厥咎內疚於心其勅公卿舉賢良方正各一
人百僚並上封事無有隱諱有司修職務遵法度十一

月丁卯詔王莽時吏人沒入為奴婢不應舊法者皆免
為庶人十二月壬辰大司空宋弘免癸巳詔曰頃者師
旅未解用度不足故行什一之稅今軍士屯田糧儲差
積其令郡國收見田租三十稅一如舊制隄鄣遣將行
巡寇扶風征西大將軍馮異拒破之是歲初罷郡國都
尉官始遣列侯就國匈奴遣使來獻使中郎將報命
七年春正月丙申詔中都官三輔郡國出繫囚非犯殊
死皆一切勿案其罪見徒免為庶民耐罪亡命吏以文

除之又詔曰世以厚葬為德薄終為鄙至於富者奢僭
貧者單財法令不能禁禮義不能止倉卒乃知其咎其
布告天下令知忠臣孝子慈兄悌弟薄葬送終之義二
月辛巳罷護曹都尉官三月丁酉詔曰今國有衆軍並
多精勇宜且罷輕車騎士材官樓船士及軍假吏令還
復民伍公孫述立隗躡為朔寧王癸亥晦日有食之避
正殿寢兵不聽事五日詔曰吾德薄致災譴見日月戰
慄恐懼夫何言哉今方念愆庶消厥咎其令有司各修

職任奉遵法度惠茲元元百僚各上封事無有所諱其上書者不得言聖夏四月壬午詔曰比陰陽錯謬日月薄食百姓有過在予一人大赦天下公卿司隸州牧舉賢良方正各一人遣詣公車朕將覽試焉五月戊戌前將軍李通為大司空甲寅詔吏人遭饑亂及為青徐賊所略為奴婢下妻欲去留者恣聽之敢拘制不還以賣人法從事是夏連雨水漢忠將軍王常為橫野大將軍八月丁亥封前河間王邵為河間王隗囂寇安定征西

大將軍馮異征虜將軍祭遵擊却之冬盧芳所置朔方
太守田颯雲中太守喬扈各舉郡降是歲省長水射聲
二校尉官

八年春正月中郎將來歙襲略陽殺隗躡守將而據其
城夏四月司隸校尉傅亢下獄死隗躡攻來歙不能下
閏月帝自征躡河西太守竇融率五郡太守與車駕會
高平隴右潰隗囂奔西城遣大司馬吳漢征南大將軍
岑彭圍之進幸上邽不降命虎牙大將軍蓋延建威大

將軍耿弇攻之潁川盜賊寇沒屬縣河東守守兵亦叛
京師騷動秋大水八月帝自上邽晨夜東馳九月乙卯
車駕還宮庚申帝自征潁川盜賊皆降安邱侯張步叛
歸琅邪太守陳俊討獲之戊寅至自潁川冬十月丙午
幸懷十一月乙丑至自懷公孫述遣兵救隗躡吳漢蓋
延等還軍長安天水隴西復反歸躡十二月高句麗王
遣使奉貢是歲大水

九年春正月隗躡病死其將王元周宗復立躡子純為

王徙鴈門吏人於太原三月辛亥初置青巾左校尉官
公孫述遣將田戎任滿據荊門夏六月丙戌韋續氏登
轅轅遣大司馬吳漢率四將軍擊盧芳將賈覽於高柳
戰不利秋八月遣中郎將來歙監征西大將軍馮異等
五將軍討隗純於天水驃騎大將軍杜茂與賈覽戰於
繁峙茂軍敗績是歲省關都尉復置護羌校尉官

十年春正月大司馬吳漢率捕虜將軍王霸等五將軍
擊賈覽於高柳匈奴遣騎救覽諸將與戰却之修理長

安高廟夏征西大將軍馮異破公孫述將趙匡於天水
斬之征西大將軍馮異薨秋八月己亥幸長安祠高廟
遂有事十一陵戊戌進幸汧隄將高峻降冬十月中
郎將來歙等大破隗純於落門其將王元奔蜀純與周
宗降隴右平先零羌寇金城隴西來歙率諸將擊羌於
五谿大破之庚寅車駕還宮是歲省定襄郡徙其民於
西河泗水王歙薨淄川王終薨

十一年春二月己卯詔曰天地之性人為貴其殺奴婢

不得減罪己酉幸南陽還幸章陵祠園陵城陽王祉薨
庚午車駕還宮閏月征南大將軍岑彭率三將軍與公
孫述將田戎任滿戰於荊門大破之獲任滿威虜將軍
馮駿圍田戎於江州岑彭遂帥舟師伐公孫述平巴郡
夏四月丁卯省大司徒司直官先零羌寇臨洮六月中
郎將來歙率揚武將軍馬成破公孫述將王元環安於
下辯安遣間人刺殺中郎將來歙帝自將征公孫述秋
七月次長安八月岑彭破公孫述將侯丹於黃石輔威

將軍臧宮與公孫述將延岑戰於沈水大破之王元降
至自長安癸亥詔曰敢炙灼奴婢論如律免所炙灼者
為庶民冬十月壬午詔除奴婢射傷人棄市律公孫述
遣間人刺殺征南大將軍岑彭馬成平武都因隴西太
守馬援擊破先零羌徙致天水隴西扶風十二月大司
馬吳漢率舟師伐公孫述是歲省朔方牧并并州初斷
州牧自還奏事

十二年春正月大司馬吳漢與公孫述將史興戰於武

陽斬之三月癸酉詔隴蜀民被略為奴婢自訟者及獄官未報一切免為庶民夏甘露降南行唐六月黃龍見東阿秋七月威虜將軍馮駿拔江州獲田戎九月吳漢大破公孫述將謝豐於廣都斬之輔威將軍臧宮拔涪城斬公孫恢大司空李通罷冬十一月戊寅吳漢臧宮與公孫述戰於成都大破之述被創夜死辛巳吳漢屠成都夷述宗族及延岑等十二月辛卯揚武將軍馬成行大司空事是歲九真徼外蠻夷張遊率種人內屬封

為歸漢里君省金城郡屬隴西參狼羌寇武都隴西太守馬援討降之詔邊吏力不足戰則守追虜料敵不拘以逗留法橫野大將軍王常薨遣驃騎大將軍杜茂將衆郡施刑屯北邊築亭候修烽燧

十三年春正月庚申大司徒侯霸薨戊子詔曰往年已勅郡國異味不得有所獻御今猶未止非徒有豫養導擇之勞至乃煩擾道上疲費過所其令太官勿復受明勅下以遠方口實所以薦宗廟自如舊制二月遣捕虜

將軍馬武屯虜沱河以備匈奴盧芳自五原亡入匈奴
丙辰詔曰長沙王興真定王得河間王邵中山王茂皆
襲爵為王不應經義其以興為臨湘侯得為真定侯邵
為樂成侯茂為單父侯其宗室及絕國封侯者凡一百
三十七人丁巳降趙王良為趙公太原王章為齊公魯
王興為魯公庚午以殷紹嘉公孔安為宋公周承休公
姬常為衛公省并西京十三國廣平屬鉅鹿真定屬常
山河間屬信都城陽屬琅邪泗水屬廣陵淄川屬高密

膠東屬北海陸安屬廬江廣陽屬上谷三月辛未沛郡
太守韓歆為大司徒丙子行大司空馬成罷夏四月大
司馬吳漢自蜀還京師於是大饗將士班勞策勲功臣
增邑更封凡三百六十五人其外戚恩澤封者四十五
人罷左右將軍官建威大將軍耿弇罷益州傳送公孫
述贄師郊廟樂器葆車輿輦於是法物始備時兵革既
息天下少事文書調役務從簡寡至乃十存一焉甲寅
冀州牧竇融為大司空五月匈奴寇河東秋七月廣漢

徼外白馬羌豪率種人內屬九月日南徼外蠻夷獻白雉白兔冬十二月甲寅詔益州民自八年以來被略為奴婢者皆一切免為庶民或依託為人下妻欲去者恣聽之敢拘留者比青徐二州以略人法從事復置金城郡

十四年春正月起南宮前殿匈奴遣使奉獻使中郎將報命夏四月辛巳封孔子後志為褒成侯越雋人任貴自稱太守遣使奉計秋九月平城人賈丹殺盧芳將尹

由來降是歲會稽大疫莎車國鄯善國遣使奉獻十二月癸卯詔益梁二州奴婢自八年以來自訟在所官一切免為庶民賣者無還直

十五年春正月辛丑大司徒韓歆免自殺丁未有星孛于昴汝南太守歐陽歆為大司徒建義大將軍朱祐罷丁未有星孛于營室二月徙鴈門代郡上谷三郡民置常關居庸關以東初巴蜀既平大司馬吳漢上書請封皇子不許重奏連歲三月乃詔羣臣議大司空融固始

侯通膠東侯復高密侯禹太常登等奏議曰古者封建諸侯以藩屏京師周封八百同姓諸姬並為建國夾輔王室尊事天子享國永長為後世法故詩云大啓爾宇為周室輔高祖聖德光有天下亦務親親封立兄弟諸子不違舊章陛下德橫天地興復宗統褒德賞勲親睦九族功臣宗室咸蒙封爵多受廣地或連屬縣今皇子賴天能勝衣趨拜陛下恭謙克讓抑而不議羣臣百姓莫不失望宜因盛夏吉時定號位以廣蕃輔明親親尊

宗廟重社稷應古合舊厭塞衆心臣請大司空融上輿
地圖太常擇日具禮儀制曰可夏四月戊申以太牢告
祠宗廟丁巳使太司空融告廟封皇子輔為右翊公英
為楚公陽為東海公康為濟南公蒼為東平公延為淮
陽公荆為山陽公衡為臨淮公焉為左翊公京為琅邪
公癸丑追謚兄伯升為齊武公兄仲為魯哀公六月庚
午復置屯騎長水射聲三校尉官改青巾左校尉為越
騎校尉詔下州郡檢覈墾田頃畝及戶口年紀又考實

二千石長吏阿枉不平者冬十一月甲戌大司徒歐陽
歆下獄死十二月庚午關內侯戴涉為大司徒盧芳自
匈奴入居高柳是歲驃騎大將軍杜茂免虎牙大將軍
蓋延薨

十六年春二月交趾女子徵側反略有城邑三月辛丑
晦日有食之秋九月河南尹張伋及諸郡守十餘人坐
度田不實皆下獄死郡國大姓及兵長羣盜處處並起
攻劫在所害殺長吏郡縣追討到則解散去復屯結青

徐幽冀四州尤甚冬十月遣使者下郡國聽羣盜自相糾擿五人共斬一人者除其罪吏雖逗留迴避故縱者皆勿問聽以禽討為效其牧守令長坐界內盜賊而不收捕者又以畏懦捐城委守者皆不以為負但取獲賊多少為殿最唯蔽匿者乃罪之於是更相追捕賊並解散徙其魁帥於他郡賦田受稟使安生業自是牛馬放牧邑門不開盧芳遣使乞降十二月甲辰封芳為代王初王莽亂後貨幣雜用布帛金粟是歲始行五銖錢

十七年春正月趙公良薨二月乙亥晦日有蝕之夏四月乙卯南巡狩皇太子及右翊公輔楚公英東海公陽濟南公康東平公蒼從幸潁川進幸葉章陵五月乙卯車駕還宮六月癸巳臨淮公衡薨秋七月妖巫李廣等羣起據皖城遣虎賁中郎將馬援驃騎將軍段志討之九月破皖城斬李廣等冬十月辛巳廢皇后郭氏為中山太后立貴人陰氏為皇后進右翊公輔為中山王食常山郡其餘九國公皆即舊封進爵為王甲申幸章陵

修園廟祠舊宅觀田廬置酒作樂賞賜時宗室諸母因
酣悅相與語曰文叔少時謹信與人不款曲唯直柔耳
今乃能如此帝聞之大笑曰吾理天下亦欲以柔道行
之乃悉為舂陵宗室起祠堂有五鳳凰見於潁川之邾
縣十二月至自章陵是歲莎車國遣使貢獻

十八年春二月蜀郡守將史歆叛遣大司馬吳漢率二
將軍討之圍成都甲寅西巡狩幸長安三月壬午祠高
廟遂有事十一陵歷馮翊界進幸蒲坂祠后土夏四月

甲戌車駕還宮癸酉詔曰今邊郡盜穀五十斛罪至於死開殘吏妄殺之路其蠲除此法同之內郡遣伏波將軍馬援率橫船將軍段志等擊交趾賊徵側等戊申幸河內戊子至自河內五月旱盧芳復亡入匈奴秋七月吳漢拔成都斬史歆等壬戌赦益州所部殊死以下冬十月庚辰幸宜城還祠章陵十二月乙丑車駕還宮是歲罷州牧置刺史

十九年春正月庚子追尊孝宣皇帝曰中宗始祠昭帝

元帝於太廟成帝哀帝平帝於長安春陵節侯以下四世於章陵妖巫單臣傅鎮等反據原武太中大夫臧宮圍之夏四月拔原武斬臣鎮等伏波將軍馬援破交阯斬徵側等因擊破九真賊都陽等降之閏月戊申進趙齊魯三國公爵為王六月戊申詔曰春秋之義立子以貴東海王陽皇后之子宜承大統皇太子彊崇執謙退願備藩國父子之情重久違之其以彊為東海王立陽為皇太子改名莊秋九月南巡狩壬申幸南陽進幸汝

南南頓縣舍置酒會賜吏人復南頓田租歲父老前叩
頭言皇考居此日久陛下識知寺舍每來輒加厚恩願
賜復十年帝曰天下重器常恐不任日復一日安敢遠
期十歲乎吏人又言陛下實惜之何言謙也帝大笑復
增一歲進幸淮陽梁沛西南夷寇益州郡遣武威將軍
劉尚討之越雋太守任貴謀叛十二月劉尚襲貴誅之
是歲復置函谷關都尉修西京宮室

二十年春正月戊子車駕還宮夏四月庚辰大司徒戴

涉下獄死大司空竇融免五月辛亥大司馬吳漢薨匈奴寇上黨天水遂至扶風六月庚寅廣漢太守蔡茂為大司徒太僕朱浮為大司空壬辰左中郎將劉隆為驃騎將軍行大司馬事乙未徙中山王輔為沛王秋東夷韓國人率衆詣樂浪內附冬十月東巡狩甲午幸魯進幸東海楚沛國十二月匈奴寇天水壬寅車駕還宮是歲省五原郡徙其吏人置河東復濟陽縣徭役六歲二十一年春正月武威將軍劉尚破益州夷平之夏四

月安定屬國胡叛屯聚青山遣將兵長史陳訢討平之
秋鮮卑寇遼東遼東太守祭彤大破之冬十月遣伏波
將軍馬援出塞擊烏桓不剋匈奴寇上谷中山其冬鄯
善王車師王等十六國皆遣子入侍奉獻願請都護帝
以中國初定未遑外事乃還其侍子厚加賞賜

二十二年春閏月丙戌幸長安祠高廟遂有事十一陵
二月己巳至自長安夏五月乙未晦日有食之秋七月
司隸校尉蘇鄴下獄死九月戊辰地震裂制詔曰日者

地震南陽尤甚夫地者任物至重靜而不動者也而今
震裂咎在君上鬼神不順無德災殃將及吏人朕甚懼
焉其令南陽勿輸今年田租芻橐遣謁者按行其死罪
繫囚在戊辰以前減死罪一等徒皆弛解鉗衣絲絮賜
郡中居人壓死者棺錢人三千其口賦逋稅而廬宅尤
破壞者勿收責吏人死亡或在壞垣毀屋之下而家羸
弱不能收拾者其以見錢穀取傭為尋求之冬十月壬
子大司空朱浮免癸丑光祿勳杜林為大司空是歲齊

王章薨青州蝗匈奴冀韃日逐王比遣使詣漁陽請和
親使中郎將李茂報命烏桓擊破匈奴匈奴北徙幕南
地空詔罷諸邊郡亭候吏卒

二十三年春正月南郡蠻叛遣武威將軍劉尚討破之
徙其種人於江夏夏五月丁卯大司徒蔡茂薨秋八月
丙戌大司空杜林薨九月辛未陳留太守王況為大司
徒冬十月丙申太僕張純為大司空高句麗率種人詣
樂浪內屬十二月武陵蠻叛寇掠郡縣遣劉尚討之戰

於沅水尚軍敗沒是歲匈奴薁鞬日逐王比率部曲遣使詣西河內附

二十四年春正月乙亥大赦天下匈奴薁鞬日逐王比遣使款五原塞求扞禦北虜秋七月武陵蠻寇臨沅遣謁者李嵩中山太守馬成討蠻不尅於是伏波將軍馬援率四將軍討之詔有司申明舊制阿附蕃王法冬十二月匈奴薁鞬日逐王比自立為單于於是分為南北匈奴

二十五年春正月遼東徼外貊人寇右北平漁陽上谷
太原遼東太守祭彤招降之烏桓大人來朝南單于遣
使詣闕貢獻奉藩稱臣又遣其左賢王擊破北匈奴却
地千餘里三月南單于遣子入侍戊申晦日有食之伏
波將軍馬援等破武陵蠻於臨沅冬十月叛蠻悉降夫
餘王遣使奉獻是歲烏桓大人率衆內屬詣闕朝貢
二十六年春正月詔有司增百官奉其千石已上減於
西京舊制六百石已下增於舊秩初作壽陵將作大匠

竇融上言園陵廣袤無慮所用帝曰古者帝王之葬皆陶人瓦器木車茅馬使後世之人不知其處太宗識終始之義景帝能述遵孝道遭天下反覆而霸陵獨完受其福豈不美哉今所制地不過二三頃無為山陵陂池裁令流水而已遣中郎將段郴授南單于璽綬令入居雲中始置使匈奴中郎將將兵衛護之南單于遣子入侍奉奏詣闕於是雲中五原朔方北地定襄鴈門上谷代八郡民歸於本土遣謁者分將施刑補理城郭發遣

邊民在中國者布還諸縣皆賜以裝錢轉輸給食

二十七年夏四月戊午大司徒玉况薨五月丁丑詔曰
昔契作司徒禹作司空皆無大名其令二府去大又改
大司馬為太尉驃騎大將軍行大司馬劉隆即日罷以
太僕趙憙為太尉大司農馮勤為司徒益州郡徼外蠻
夷率種人內屬北匈奴遣使詣武威乞和親冬魯王興
齊王石始就國

二十八年春正月己巳徙魯王興為北海王以魯國益

東海賜東海王彊虎賁旄頭鐘虞之樂夏六月丁卯沛
太后郭氏薨因詔郡縣捕王侯賓客坐死者數千人秋
八月戊寅東海王彊沛王輔楚王英濟南王康淮陽王
延始就國冬十月癸酉詔死罪繫囚皆一切募下蠶室
其女子宫北匈奴遣使貢獻乞和親

二十九年春二月丁巳朔日有食之遣使者舉冤獄出
繫囚庚申賜天下男子爵人二級鰥寡孤獨篤癰貧不
能自存者粟人五斛夏四月乙丑詔令天下繫囚自殊

死已下及徒各減本罪一等其餘贖罪輸作各有差

三十年春正月鮮卑大人內屬朝賀二月東巡狩甲子
幸魯進幸濟南閏月癸丑車駕還宮有星孛於紫宮夏
四月戊子徙左翊王焉為中山王五月大水賜天下男
子爵人二級鰥寡孤獨篤癰貧不能自存者粟人五斛
秋七月丁酉幸魯國復濟陽縣是年徭役冬十一月丁
酉至自魯

三十一年夏五月大水戊辰賜天下男子爵人二級鰥

寡孤獨篤癘貧不能自存者粟人六斛癸酉晦日有食
之是夏蝗秋九月甲辰詔令死罪繫囚皆一切募下蠶
室其女子宮是歲陳留雨穀形如稗實北匈奴遣使貢
獻

中元元年春正月東海王彊沛王輔楚王英濟南王康
淮陽王延趙王盱眙皆來朝丁卯東巡狩二月己卯幸魯
進幸太山北海王興齊王石朝於東嶽辛卯柴望岱宗
登封太山甲午禪於梁父三月戊辰司空張純薨夏四

月癸酉車駕還宮己卯大赦天下復羸博梁父奉高勿
出今年田租芻橐改年為中元行幸長安戊子祠長陵
五月乙丑至自長安六月辛卯太僕馮魴為司空乙未
司徒馮勤薨是歲京師醴泉涌出飲之者痼疾皆愈惟
眇蹇者不瘳又有赤草生於水崖郡國頻上嘉瑞帝常
自謙無德抑而不當故史官罕得記焉秋郡國三蝗冬
十月辛未司隸校尉東萊李訢為司徒甲申使司空告
祠高廟曰高皇帝與羣臣約非劉氏不王呂太后賊害

三趙專王呂氏賴社稷之靈祿產伏誅天命幾墜危朝
更安呂太后不宜配食高廟同祧至尊薄太后母德慈
仁孝文皇帝賢明臨國子孫賴福延祚至今其上薄太
后尊號曰高皇后配食地祇遷呂太后廟主於園四時
上祭十一月甲子晦日有食之是歲初起明堂靈臺辟
雍及北郊兆域宣布圖讖於天下復濟陽南頓是年徭
役參狼羌寇武都敗郡兵隴西太守劉盱遣軍救之及
武都郡兵討叛羌皆破之

二年春正月辛未初立北郊祀后土東夷倭奴國王遣使奉獻二月戊戌帝崩於南宮前殿年六十二遺詔曰朕無益百姓皆如孝文皇帝制度務從約省刺史二千石長吏皆無離城郭無遣吏及因郵奏初帝在兵間久厭武事且知天下疲耗思樂息肩自隴蜀平後非倣急未嘗復言軍旅皇太子嘗問攻戰之事帝曰昔衛靈公問陳孔子不對此非爾所及每旦視朝日昃乃罷數引公卿郎將講論經理夜分乃寐皇太子見帝勤勞不怠

承間諫曰陛下有禹湯之明而失黃老養性之福願頤
愛精神優游自寧帝曰我自樂此不為疲也雖身濟大
業兢兢如不及故能明慎政體總攬權綱量時度力舉
無過事退功臣而進文吏戢弓矢而散馬牛雖道未方
古斯亦止戈之武焉初皇考南頓君欽為濟陽令以建
平元年十二月甲子夜生光武於縣舍有赤光照室中
欽異焉使卜者王長占之長辟左右曰此兆吉不可言
是歲縣界有嘉禾生一莖九穗因名光武曰秀明年方

士有夏賀良者上言哀帝云漢家歷運中哀當再受命
於是改號為太初元年稱陳聖劉太平皇帝以厭勝之
及王莽篡位忌惡劉氏以錢文有金刀故改為貨泉字
文為白水真人後望氣者蘇伯阿為王莽使至南陽遙
望見舂陵郭喈曰氣佳哉鬱鬱葱葱然及始起兵還舂
陵遠望舍南火光赫然屬天有頃不見其後道士西門
君惠李守等亦云劉秀當為天子其王者受命信有符
乎不然何以能乘時龍而御天哉范氏贊曰炎正中微

大盜移國九縣颯回三精霧塞人厭淫詐神思反德光
武誕命靈貺自甄沈幾先物深略緯文尋邑百萬貔虎
為羣長轂雷野高鋒彗雲英武既振新都自焚虔劉庸
代紛紜梁趙三河未澄四關重擾神旌乃顧遞行天討
金湯失險車書共道靈慶既啓人謀咸贊明明廟謨赴
趙雄斷於赫有命系隆我漢

世祖光武皇帝建武三十一年中元二年即位三
十三年

顯宗孝明皇帝諱莊光武第四子也母陰皇后帝生而
豐下十歲能通春秋光武奇之建武十五年封東海公
十七年進爵為王十九年立為皇太子師事博士桓榮
學通尚書中元二年二月戊戌即皇帝位年三十尊皇
后曰皇太后三月丁卯葬光武皇帝於原陵有司奏上
尊廟曰世祖夏四月丙辰詔賜天下男子爵人二級三
老孝悌力田人三級爵過公乘得移與子若同產同產
子及流人無名數欲自占者人一級鰥寡孤獨篤癯粟

人十斛其施刑及郡國徒在中元元年四月己卯赦前所犯而後捕繫者悉免其刑又邊人遭亂為內郡人妻在己卯赦前一切遣還邊恣其所樂中二千石下至黃綬貶秩贖論者悉皆復秩還贖以高密侯禹為太傅東平王蒼為驃騎將軍封太尉熹為節鄉侯司徒訢為安鄉侯司空魴為楊邑侯秋九月燒當羌寇隴西敗郡兵於允街赦隴西囚徒減罪一等勿收今年租調又所發天水三千人亦復是歲更賦遣謁者張鴻討叛羌於允吾

鴻軍大敗戰歿冬十一月遣中郎將竇固監捕虜將軍
馬武等二將軍討燒當羌十二月甲寅詔以方春戒節
其勅有司務順時氣天下亡命殊死以下聽得贖論死
罪入縲二十四匹右趾至髡鉗城旦春十匹完城旦春至
司寇作三匹其未發覺詔書到先自告者半入贖今選
舉不實邪佞未去權門請託殘吏放手百姓愁怨情無
告訴有司明奏罪名并正舉者及郡縣每因徵發輕為
姦利詭責羸弱先急下貧其務在均平無令枉刻

永平元年春正月帝率公卿已下朝於原陵如元會儀
夏五月太傅鄧禹薨戊寅東海王彊薨遣司空馮魴持
節視喪事賜升龍旄頭鑾輅龍旗六月乙卯葬東海恭
王秋七月捕虜將軍馬武等與燒當羌戰大破之募士
卒戍隴右賜錢人三萬八月戊子徙山陽王荆為廣陵
王遣就國是歲遼東太守祭彤使鮮卑擊赤山烏桓大
破之斬其渠帥越雋姑復夷叛州郡討平之

二年春正月辛未宗祀光武皇帝於明堂帝及公卿列

侯始服冠冕衣裳玉佩紉屨以行事禮畢登靈臺使尚書令持節詔驃騎將軍三公宣布詔旨令天下自殊死已下謀反大逆皆赦除之百僚師尹其勉修厥職順行時令敬若昊天以綏兆人三月臨辟雍初行大射禮秋九月沛王輔楚王英濟南王康淮陽王延東海王政來朝冬十月壬子幸辟雍初行養老禮詔以三老李躬年耆學明五更桓榮授朕尚書宜有酬報其賜榮爵關內侯食邑五千戶三老五更皆以二千石祿養終厥身其

賜天下三老酒人一石肉四十觔有司其存者耆恤幼孤惠鰥寡稱朕意焉中山王馬始就國甲子西巡狩幸長安祠高廟遂有事於十一陵歷覽館邑會郡縣吏勞賜作樂十一月甲申遣使者以中牢祠蕭何霍光帝謁陵園過式其墓進幸河東所過賜二千石令長已下至於掾史各有差癸卯車駕還宮十二月護羌校尉竇林下獄死是歲始迎氣於五郊少府陰就子豐殺其妻酈邑公主就坐自殺

三年春正月癸巳詔有司勉順時氣督勸農桑詳刑慎
罰明察單辭以稱朕意二月甲寅太尉趙憙司徒李訢
免丙辰左馮翊郭丹為司徒己未南陽太守虞延為太
尉甲子立貴人馬氏為皇后皇子烜為皇太子賜天下
男子爵人二級三老孝悌力田人三級流人無名數欲
占者人一級鰥寡孤獨篤癯貧不能自存者粟人五斛
夏四月辛酉立皇子建為千乘王羨為廣平王六月丁
卯有星孛于天船北秋八月戊辰改太樂為大予樂壬

申晦日有食之詔言事者靡有所諱冬十月烝祭光武廟初奏文始五行武德之舞甲子車駕從皇太后幸章陵觀舊廬十二月戊辰至自章陵是歲起北宮及諸官府京師及郡國七大水

四年春二月辛亥詔朕親耕籍田以祈農事而比再得時雨宿麥潤澤其賜公卿半奉有司勉遵時政務平刑罰秋九月戊寅千乘王建薨冬十月乙卯司徒郭丹司空馮魴免丙辰河南尹范遷為司徒太僕伏恭為司空

十二月陵侯梁松下獄死

五年春二月庚戌驃騎將軍東平王蒼罷歸藩琅邪王
京就國冬十月行幸鄴與趙王栩會鄴常山三老言於
帝曰上生於元氏願蒙優復詔復元氏縣田租更賦六
歲勞賜縣掾史及門閭走卒至自鄴十一月北匈奴寇
五原十二月寇雲中南單于擊却之是歲發遣邊人在
內郡者賜裝錢人二萬

六年春正月沛王輔楚王英東平王蒼淮陽王延琅邪

王京東海王政趙王盱北海王興齊王石來朝二月王
雒山出寶鼎廬江太守獻之夏四月甲子詔太常以初
祭之日陳鼎於廟以備器用賜三公帛五十匹九卿二
千石半之又詔先帝詔書禁人上事言聖而間者章奏
頗多浮詞自今若有過稱虛譽尚書皆宜抑而不省示
不為諂子蚩也冬十月行幸魯祠東海恭王陵會沛王輔
楚王英淮南王康東平王蒼淮南王延琅邪王京東海
王政十二月還幸陽城遣使者祠中岳壬午車駕還宮

東平王蒼琅邪王京從駕來朝皇太后

七年春正月癸卯皇太后陰氏崩二月庚申葬光烈皇后秋八月戊辰北海王興薨是歲北匈奴遣使乞和親八年春正月己卯司徒范遷薨三月辛卯太尉虞延為司徒衛尉趙憙行太尉事遣越騎司馬鄭眾報使匈奴初置度遼將軍屯五原曼栢秋郡國十四雨水冬十月北宮成丙子臨辟雍養三老五更禮畢詔三公募郡國中都官死罪繫囚減罪一等勿笞詣度遼將軍營屯朔

方五原之邊縣妻子自隨便占著邊縣父母同產欲相代者恣聽之其夫逆無道殊死者一切募下蠶室亡命者令贖罪各有差凡徙者賜弓弩衣糧壬寅晦日有食之既詔曰朕以無德奉承大業而下貽人怨上動三光永思厥咎在予一人羣司勉修職事極言無諱於是在位者皆上封事各言得失帝覽章深自引咎乃以所上班示百官北匈奴寇河西諸郡

九年春三月辛丑詔郡國死罪囚減罪與妻子詣五原

朔方占著所在死者皆賜妻父若男同產一人復終身
其妻無父兄獨有母者賜其母錢六萬又復其口筭夏
四月甲辰詔郡國以公田賜貧人各有差令司隸校尉
部刺史歲上墨綬長吏視事三歲已上理狀尤異者各
一人與計偕上及尤不政理者亦以聞是歲大有年為
四姓小侯開立學校置五經師

十年春二月廣陵王荆有罪自殺國除夏四月戊子詔
曰昔歲五穀登衍今茲蠶麥善收其大赦天下閏月甲

午南巡狩幸南陽祠章陵日北至又祠舊宅禮畢召校
官弟子作雅樂奏鹿鳴帝自御塏荒和之以娛嘉賓還
幸南頓勞饗三老官屬冬十月徵淮陽王延會平輿徵
沛王輔會睢陽十二月甲午車駕還宮

十一年春正月沛王輔楚王英濟南王康東平王蒼淮
陽王延中山王馬琅邪王京東海王政來朝秋七月司
隸校尉郭霸下獄死是歲溧湖出黃金廬江太守以獻
時麒麟白雉醴泉嘉禾所在出焉

十二年春正月益州徼外夷哀牢王相率內屬於是置永昌郡罷益州西部都尉夏四月遣將作謁者王吳修汴渠自滎陽至于千乘海口五月丙辰賜天下男子爵人二級三老孝悌力田人三級流民無名數欲占者人一級鰥寡孤獨篤癯貧無家屬不能自存者粟人三斛詔天下厚葬及車服侈美者令有司申明科禁宣下郡國秋七月乙亥司空伏恭罷乙未大司農牟融為司空冬十月司隸校尉王康下獄死是歲天下安平人無徭

役歲比登稔百姓殷富粟斛三十牛羊被野

十三年春二月帝耕於籍田禮畢賜觀者食三月河南
尹薛昭下獄死夏四月汴渠成辛巳行幸滎陽巡行河
渠乙酉詔曰自汴渠決敗六十餘歲兗豫之人多被水
患今既築隄理渠絕水立門河汴分流復其舊迹陶邱
之北漸就壤墳其濱渠下田悉賦予貧人無令豪右得
固其利因遂度河登太行進幸上黨壬寅車駕還宮冬
十月壬辰晦日有食之三公免冠自劾制曰冠履勿劾

災異屢見咎在朕躬其令刺史太守詳刑理冤存恤鰥寡勉思厥職庶幾和穆陰陽消伏災譴焉十一月楚王英謀反廢國除遷於涇縣所連及死徙者數千人是歲齊王石薨

十四年春三月甲戌司徒虞延免自殺夏四月丁巳鉅鹿太守南陽邢穆為司徒前楚王英自殺夏五月封故廣陵王荆子元壽為廣陵侯初作壽陵

十五年春二月庚子東巡狩辛丑幸偃師詔亡命自殊

死以下贖死罪縑四十匹右趾至髡鉗城旦春十匹完城旦至司寇五匹犯罪未發覺詔書到日自告者半入贖徵沛王輔會睢陽進幸彭城癸亥帝耕于下邳三月徵琅邪王京會良成徵東平王蒼會陽都又徵廣陵侯及其三弟會魯祠東海恭王陵還幸孔子宅祠仲尼及七十二弟子親御講堂命王太子諸王說經又幸東平辛卯進幸大梁至定陶祠定陶恭王陵夏四月庚子車駕還宮改信都為樂成國臨淮為下邳國封皇子恭為

鉅鹿王黨為樂成王衍為下邳王暢為汝南王昺為常
山王長為濟陰王賜天下男子爵人三級郎從官二十
歲已下帛百匹十歲已上二十四十歲已下十匹官府
吏五匹書佐小史三匹令天下大酺五日乙巳大赦天
下其謀反大逆及諸不應宥者皆赦除之冬車騎校獵
上林苑十二月遣奉車都尉竇固駙馬都尉耿秉屯涼
州

十六年春二月遣太僕祭彤出高闕奉車都尉竇固出

酒泉駙馬都尉耿秉出居延騎都尉來苗出平城伐北
匈奴實固破呼衍王於天山留兵屯伊吾廬城耿秉來
苗祭彤並無功而還夏五月淮陽王延謀反發覺癸丑
司徒邢穆駙馬都尉韓光坐事下獄死所連及誅死者
甚衆戊午晦日有食之六月丙寅大司農西河王敏為
司徒秋七月淮陽王延徙封阜陵王九月丁卯詔令郡
國中都官死罪繫囚減死罪一等勿笞詣軍營屯朔方
敦煌妻子自從父母同產欲求從者恣聽之女子嫁為

人妻勿與俱謀反大逆無道不用此書是歲北匈奴寇雲中雲中太守廉范擊破之

十七年春正月甘露降於甘陵北海王睦薨二月乙巳司徒王敏薨三月癸丑汝南太守鮑昱為司徒是歲甘露仍降樹枝內附芝草生殿前神雀五色翔集京師西南夷哀牢僭耳焦僥槃木白狼動黏諸種前後慕義貢獻西域諸國遣子入侍夏五月戊子公卿百官以帝威德懷遠祥物顯應乃並集朝堂奉觴上壽制書追美高

祖光武聖德命太常擇吉日策告宗廟其賜天下男子爵人二級三老孝悌力田人三級流人無名數欲占者人一級鰥寡孤獨篤癯貧不能自存者粟人三斛郎從官視事十歲已上者帛十匹中二千石二千石下至黃綬貶秩奉贖在去年以來皆還贖秋八月丙寅令武威張掖酒泉敦煌及張掖屬國繫囚右趾已下任兵者皆一切勿治其罪詣軍營冬十一月遣奉車都尉竇固駙馬都尉耿秉騎都尉劉張出敦煌昆侖塞擊破白山虜

於蒲類海上遂入車師初置西域都護戊巳校尉是歲
改天水為漢陽郡

十八年春三月丁亥詔令天下亡命自殊死巳下贖死
罪繯三十匹右趾至髡鉗城旦春十匹完城旦至司寇
作五匹吏人犯罪未發覺詔書到自告者半入贖夏四
月巳未詔曰自春以來時雨不降宿麥傷旱秋種未下
政失厥中憂懼而已其賜天下男子爵人二級及流民
無名數欲占者人一級鰥寡孤獨篤癯貧不能自存者

粟人三斛理冤獄錄輕繫二千石分禱五嶽四瀆郡界
有名山大川能興雲致雨者長吏各潔齋禱請冀蒙嘉
澍六月己未有星孛於太微焉耆龜茲攻西域都護陳
睦悉沒其衆北匈奴及車師後王圍戊己校尉耿恭秋
八月壬子帝崩於東宮前殿年四十八遺詔無起寢廟
藏主於光烈皇后更衣別室帝初作壽陵制令流水而
已石槨廣一丈二尺長二丈五尺無得起墳萬年之後
埽地而祭杵水脯糒而已過百日唯四時設奠置吏卒

數人供給灑埽勿開修道敢有所興作者以擅議宗廟
法從事帝遵奉建武制度無敢違者後宮之家不得封
侯與政館陶公主為子求郎不許而賜錢千萬謂羣臣
曰郎官上應列宿出宰百里苟非其人則民受其殃是
以難之故吏稱其官民安其業遠近肅服戶口滋殖焉
范氏論曰明帝善刑理法令分明日晏坐朝幽枉必達
內外無佞曲之私在上無矜大之色斷獄得情號居前
代十二故後之言事者莫不先建武永平之政而鍾離

意宋均之徒常以察慧為言夫豈弘人之度未優乎

明帝永平十八年即位十八年

肅宗孝章皇帝諱烜顯宗第五子也母賈貴人永平三年立為皇太子少寬容好儒術顯宗器重之十八年八月壬子即皇帝位年十九尊皇后曰皇太后壬戌葬孝明皇帝於顯節陵冬十月丁未大赦天下賜民爵人二級為父後及孝悌力田人三級脫無名數及流人欲占者人一級爵過公乘得移與子若同產子鰥寡孤獨篤

癯貧不能自存者粟人二斛詔書申勅百僚以行太尉
事節鄉侯熹為太傅司空融為太尉並錄尚書事十一
月戊戌以蜀郡太守第五倫為司空詔征西將軍耿秉
屯酒泉遣酒泉太守段彭救戊巳校尉耿恭討車師甲
辰晦日有食之於是避正殿寢兵不聽事五日詔有司
各上封事十二月癸巳有司奏言孝明皇帝聖德淳茂
劬勞日昃身御浣衣食無兼珍澤臻四表遠人慕化焦
僥儋耳欵塞自至克伐鬼方開道西域威靈廣被無思

不服以烝庶為憂不以天下為樂備三雍之教躬養老
之禮作登歌正予樂博貫六藝不舍晝夜聰明淵塞著
在圖讖至德所感通於神明功烈光於四海仁風行於
千載而深執謙謙自稱不德無起寢廟埽地而祭除日
祀之法省送終之禮遂藏主於光烈皇后更衣別室天
下聞之莫不悽愴陛下至孝烝烝奉順聖德臣愚以為
更衣在中門之外處所殊別宜尊廟曰顯宗其四時禘
祫於光武之堂間祀悉還更衣共進武德之舞如孝文

皇帝祫祭高廟故事制曰可是歲牛疫京師及三州大早詔勿收兗豫徐州田租芻橐其以見穀賑給貧人

建初元年春正月詔三州郡國方春東作恐人稍受廩往來煩劇或妨耕農其各實覈尤貧者計所貸并與之流人欲歸本者郡縣其實稟令足還到聽過止官亭無雇舍宿長吏親躬無使貧弱遺脫小吏豪右得容姦妄詔書既下勿得稽留刺史明加督察尤無狀者丙寅詔曰比年牛多疫疾墾田減少穀價頗貴人以流亡方春

東作宜及時務二千石勉勸農桑弘致勞來羣公庶尹
各推精誠專急人事罪非殊死須立秋案驗有司明慎
選舉進柔良退貪猾順時令理冤獄布告天下使明知
朕意酒泉太守段彭討擊車師大破之罷戊巳校尉官
二月武陵澧中蠻叛三月甲寅山陽東平地震巳巳詔
令太傅三公中二千石二千石郡國守相舉賢良方正
能直言極諫之士各一人夏五月辛酉初舉孝廉郎中
寬博有謀任典城者以補長相秋七月辛亥詔以上林

池籩田賦與貧人八月庚寅有星孛於天市九月永昌
哀牢夷叛冬十月武陵郡兵討叛蠻破降之十一月阜
陵王延謀反貶為阜陵侯

二年春三月辛丑詔曰朕深惟先帝詔書每欲元元去
末歸本而今貴戚近親奢縱無度嫁娶送終僭侈自若
有司廢典莫肯舉察自今三公並宜明糾非法宣振威
風其科條制度所宜施行在事者備為之禁先京師而
後諸夏甲辰罷伊吾盧屯兵永昌越雋益州三郡民夷

討哀牢破平之夏四月戊子詔還坐楚淮陽事徙者四百餘家令歸本郡癸巳詔齊相省冰紈方空穀吹綸絮六月燒當羌叛金城太守郝崇討之敗績羌遂寇漢陽秋八月遣行車騎將軍馬防討平之十二月戊寅有星孛於紫宮

三年春正月己酉宗祀明堂禮畢登靈臺望雲物大赦天下三月癸巳立貴人竇氏為皇后賜爵人二級三老孝悌力田人三級民無名數及流民欲占者人一級鰥

寡孤獨篤癯貧不能自存者粟人五斛夏四月己巳罷
常山呼沱石曰河漕行車騎將軍馬防破燒當羌於臨
洮閏月西域假司馬班超擊姑墨大破之冬十二月丁
酉以馬防為車騎將軍武陵淩中蠻叛是歲零陵獻芝
草

四年春二月庚寅太尉牟融薨夏四月戊子立皇子慶
為皇太子賜爵人二級三老孝悌力田人三級民無名
數及流人欲自占者人一級鰥寡孤獨篤癯貧不能自

存者粟人五斛己丑徙鉅鹿王恭為江陵王汝南王暢
為梁王常山王昞為淮陽王辛卯封皇子伉為千乘王
全為平春王五月丙辰車騎將軍馬防罷甲戌司徒鮑
昱為太尉南陽太守桓虞為司徒六月癸丑皇太后馬
氏崩秋七月壬戌葬明德皇太后冬牛大疫十一月壬
戌詔曰蓋三代導人教學為本漢承暴秦褒顯儒術建
立五經為置博士其後學者精進雖曰承師亦別名家
孝宣皇帝以去聖久遠學不厭博故遂立大小夏侯尚

書後又立京氏易至建武中復置顏氏嚴氏春秋大小
戴禮博士此皆所以扶進微學尊廣道藝也中元元年
詔書五經章句煩多議欲減省至永平元年長水校尉
儵奏言先帝大業當以時施行欲使諸儒共正經義令
學者得以自助孔子曰學之不講是吾憂也又曰博學
而篤志切問而近思仁在其中矣於戲其勉之哉於是
下太常將大夫博士議郎郎官及諸生諸儒會白虎觀
講議五經同異使五官中郎將魏應承制問侍中淳于

恭奏帝親稱制臨決如孝宣甘露石渠故事作白虎議
奏是歲甘露降泉陵洮陽二縣

五年春二月庚辰朔日有食之詔公卿已下其舉直言
極諫能指朕過失者各一人遣詣公車朕將親覽而問
焉其以巖穴為先勿取浮華甲申詔以去秋雨澤不適
今時復旱如災如焚其令二千石理冤獄錄輕繫禱五
嶽四瀆及名山能興雲致雨者務加肅敬冀蒙嘉應三
月甲寅詔以吏多不良擅行喜怒或案不以罪迫脅無

辜致令自殺者一歲且多於斷獄有司其議糾舉之荆
豫諸郡兵討破武陵淩中叛蠻夏五月辛亥詔曰朕思
遲直士側席異聞其先至者各以發憤吐瀝畧聞子大
夫之志矣皆欲置於左右顧問省納建武詔書又曰堯
試臣以職不直以言語筆札今外官多曠並可以補任
戊辰太傅趙憙薨冬始行月令迎氣樂是歲零陵獻芝
草有八黃龍見於泉陵西域假司馬班超擊疏勒破之
六年春二月辛卯琅邪王京薨夏五月辛酉趙王盱薨

六月丙辰太尉鮑昱薨辛未晦日有食之秋七月癸巳
以大司農鄧彪為太尉

七年春正月沛王輔濟南王康東平王蒼中山王馬東
海王政琅邪王宇來朝夏六月甲寅廢皇太子慶為清
河王立皇子肇為皇太子己未徙廣平王羨為西平王
秋七月飲酎高廟禘祭光武皇帝孝明皇帝甲辰詔書
追念祖考賜公錢四十萬卿半之及百官執事各有差
九月甲戌幸偃師東涉卷津至河內詔不得輒修橋道

遠離城郭遣吏逢迎刺探起居以為煩擾所過欲令貧弱有利無違詔書遂覽淇園已酉進幸鄴勞饗魏郡守令已下至於三老門闌走卒賜錢各有差勞賜常山趙國吏人復元氏租賦三歲辛卯車駕還宮詔天下繫囚減死一等勿笞詣邊戍妻子自隨占著所在父母同產欲相從者恣聽之有不到者皆以乏軍興論及犯殊死一切募下蠶室其女子宮繫囚鬼薪白粲已上皆減本罪各一等輸司寇作亡命贖死罪入繯二十匹右趾至

髡鉗城旦春十匹完城旦至司寇三匹吏人有罪未發
覺詔書到自告者半入贖冬十月癸丑西巡狩幸長安
丙辰祠高廟遂有事十一陵遣使者祠太上皇於萬年
以中牢祠蕭何霍光進幸槐里岐山得銅器形似酒罇
獻之又獲白鹿帝曰上無明天子下無賢方伯民之無
良相怨一方斯器亦曷為來哉又幸長平御池陽宮東
至高陵造舟於涇而還每所到幸輒會郡縣吏人勞賜
作樂十一月詔勞賜河東守令掾以下十二月丁亥車

駕還宮是歲京師及郡國螟

八年春正月壬辰東平王蒼薨三月辛卯葬東平憲王
賜鑾輅龍旂夏六月北匈奴大人率衆款塞降冬十二
月甲午東巡狩幸陳留梁國雒陽潁陽戊申車駕還宮
詔曰五經剖判去聖彌遠章句遺辭乖疑難正恐先師
微言將遂廢絕非所以重稽古求道真也其令羣儒選
高才生受學左氏穀梁春秋古文尚書毛詩以扶微學
廣異義焉是歲京師及郡國螟

元和元年春正月中山王馬來朝日南徼外蠻夷獻生
犀白雉閏月辛丑濟陰王長薨二月甲戌詔曰八政以
食為本故古者急耕稼之業致耒耜之勤頃自牛疫以
來穀食連少刺史二千石不以為負其令郡國募人無
田欲徙他界就饒者恣聽之到在所賜給公田為雇耕
傭賃種餽貫與田器勿收租五歲除算三年其後欲還
本鄉者勿禁夏四月己卯分東平國封憲王蒼子尚為
任城王六月辛酉沛王輔薨秋七月丁未詔曰律云掠

者唯得榜笞立又令丙箠長短有數自往者大獄以來
掠考多酷鉗鑽之屬慘苦無極念其痛毒怵然動心書
曰鞭作官刑豈云若此宜及秋冬理獄明為其禁八月
甲子太尉鄧彪罷大司農鄭弘為太尉癸酉詔改建初
九年為元和元年郡國中都官繫囚減死一等勿笞詣
邊縣妻子自隨占著在所其犯殊死一切募下蠶室其
女子宮繫囚鬼薪白粲以上皆減本罪一等輸司寇作
亡命者贖各有差丁酉南巡狩詔所經道上郡縣無得

設儲峙命司空自將徒支柱橋梁有遣使奉迎探知起居二千石當坐其賜鰥寡孤獨不能自存者粟人五斛九月乙未東平王忠薨辛丑幸章陵祠舊宅園廟見宗室故人賞賜各有差冬十月乙未巡幸江陵詔廬江太守祠南嶽又詔長沙零陵太守祠長沙定王舂陵節侯鬱林府君還幸宛十一月己丑車駕還宮賜從者各有差十二月壬子詔諸以前妖惡禁錮者一皆蠲除之並得叙用但不得在宿衛而已

二年春正月乙酉詔曰令云有產子者復勿筭三歲今
諸懷姙者賜胎養穀人三斛復其夫勿筭一歲著以為
令又詔三公曰方春生養萬物孳甲宜助萌陽以育時
物其令有司罪非殊死且勿案驗及吏人條書相告不
得聽受冀以息事寧人敬奉天氣立秋如故夫俗吏矯
飾外貌似是而非朕甚厭之安靜之吏悃悃無華日計
不足月計有餘如襄城令劉方

方字伯況
平原人

吏人同聲謂

之不煩雖未有他異斯亦殆近之矣夫以苛為察以刻

為明以輕為德以重為威四者或興則下有怨心吾詔
書數下冠蓋接道而吏不加理人或失職其咎安在勉
思舊令稱朕意焉二月甲寅始用四分歷詔曰今山川
鬼神應典禮者尚未咸秩其議增修羣祀以祈豐年丙
辰東巡狩己未鳳凰集肥城乙丑帝耕於定陶詔曰三
老尊年也孝悌淑行也力田勤農也國家甚休之其賜
帛人一匹勉率農功使使者祠唐堯於成陽靈臺辛未
幸太山柴告岱宗有黃鵠三十從西南來經祠壇上東

北過於宮屋翺翔升降進幸奉高壬申宗祀五帝於汶
上明堂癸酉告祠二祖四宗大會內外羣臣丙子詔大
赦天下諸犯罪不當得赦者皆除之復博奉高嬴無出
今年田租芻橐戊寅進幸濟南三月己丑進幸魯祠東
海恭王陵庚寅祠孔子於闕里及七十二弟子賜褭成
侯及諸孔男女帛壬辰進幸東平祠憲王陵甲午遣使
者祠定陶太后恭王陵乙未幸東阿北登太行山至天
井關夏四月乙巳客星入紫宮乙卯車駕還宮庚申假

於祖禰告祠高廟五月戊申詔曰乃者鳳凰黃龍鸞鳥
比集七郡或一郡再見及白鳥神雀甘露屢臻祖宗舊
時或班恩施其賜天下吏爵人三級高年鰥寡孤獨帛
人一匹經曰無侮鰥寡惠此熒獨加賜河南女子百戶
牛酒令天下大酺五日賜公卿已下錢帛各有差及洛
陽人當酺者布戶一匹城外三戶共一匹賜博士員第
子見在太學者布人三匹令郡國上明經者口十萬以
上五人不滿十萬三人改廬江為六安國江陵復為南

郡徙江陵王恭為六安王秋七月庚子詔曰春秋於春
每月書王者重三正慎三微也律十二月立春不以報
囚月令冬至之後有順陽助生之文而無鞠獄斷刑之
政朕咨訪儒雅稽之典籍以為王者生殺宜順時氣其
定律無以十一月十二月報囚九月壬辰詔鳳凰黃龍
所見亭部無出二年租賦加賜男子爵人二級先見者
帛二十匹近者三匹太守三十匹令長十五匹丞尉半
之他如賜爵故事丙申徵濟南王康中山王馬會烝祭

冬十一月壬辰日南至初閉關梁

三年春正月乙酉詔嬰兒無父母親屬及有子不能養食者稟給如律丙申北巡狩濟南王康中山王烏西平王羨六安王恭樂成王黨淮陽王昞任城王尚沛王定皆從辛丑帝耕於懷二月壬寅告常山魏郡清河鉅鹿平原東平郡太守相曰朕前祠園陵遂望祀華霍東柴岱宗為人祈福今將禮常山遂徂北土歷魏郡經平原升踐隄防詢訪耆老月令孟春善相邱陵土地所宜今

肥田尚多未有墾闢其悉以賦貧民給與糧種務盡地力勿令游手所過縣邑聽半入今年田租以勸農夫之勞乙丑勅侍御史司空曰方春所過無得有所伐殺車可以引避引避之駢馬可輟解輟解之詩云敦彼行葦牛羊勿踐履禮人君伐一草木不時謂之不孝俗知順人莫知順天其明稱朕意戊辰進幸中山遣使者祠北嶽出長城癸酉還幸元氏祠光武顯宗於縣舍正堂明日又祠顯宗於始生堂皆奏樂三月丙子詔高邑令祠

光武即位壇復元氏七年徭役已卯進幸趙庚辰祠旁
山於靈壽辛卯車駕還宮賜從行者各有差夏四月丙
寅太尉鄭弘免大司農宋由為太尉五月丙子司空第
五倫罷太僕袁安為司空秋八月乙丑幸安邑觀鹽池
九月至自安邑冬十月北海王基薨燒當羌叛寇隴西
是歲西域長史班超擊斬疏勒王

章和元年春三月護羌校尉傅育追擊叛羌戰歿夏四
月丙子令郡國中都官繫囚減死一等詣金城戍六月

戊辰司徒桓虞免癸卯司空袁安為司徒光祿勳任隗
為司空秋七月癸卯齊王晃有罪貶為蕪湖侯壬子淮
陽王昞薨鮮卑擊破北單于斬之燒當羌寇金城護羌
校尉劉盱討之斬其渠帥壬戌詔曰朕以不德受祖宗
弘烈乃者鳳凰仍集麒麟並臻甘露宵降嘉穀滋生芝
草之類歲月不絕朕夙夜祇畏上天無以彰於先功今
改元和四年為章和元年秋令是月養衰老授几杖行
糜粥飲食其賜高年二人共布帛各一匹以為醴酪死

罪囚犯法在丙子赦前而後捕繫者皆減死勿咎詣金

城戌八月癸酉南巡狩壬午遣使者祠昭靈后於小黃

園小黃縣屬陳留郡昭靈后高祖母起兵時死小黃北後為作園廟於小黃柵甲申徵任城

王尚會睢陽戊子幸梁巳丑遣使祠沛高原廟豐枌榆

社枌榆社高祖里社在豐縣東北乙未幸沛祠獻王陵徵會東海王政

乙未晦日有食之九月庚子幸彭城東海王政沛王定

任城王尚皆從辛亥幸壽春壬子詔郡國中都官繫囚

減死罪一等詣金城戌犯殊死者一切募下蠶室其女

子宮繫囚鬼薪白粲已上減罪一等輸司寇作亡命者
贖死罪繇二十匹右趾至髡鉗城旦舂七匹完城旦至
司寇三匹吏民犯罪未發覺詔書到自告者半入贖復
封阜陵侯延為阜陵王己未幸汝陰冬十月丙子車駕
還宮北匈奴屋蘭儲等率衆降是歲西域長史班超擊
莎車大破之月氏國遣使獻扶拔師子

二年春正月濟南王康阜陵王延中山王烏來朝壬辰
帝崩於章德前殿年三十三遺詔無起寢廟一如先帝

法制范氏論曰魏文帝稱明帝察察章帝長者章帝素知人厭明帝苛切事從寬厚感陳寵之義除慘獄之科深元元之愛著胎養之令奉承明德太后盡心孝道割裂名都以崇建周親平徭簡賦而人賴其慶又體之以忠恕文之以禮樂故乃藩輔克諧羣后德讓謂之長者不亦宜乎在位十三年郡國所上符瑞合於圖書者數百千鳥呼懋哉

章帝建初八年元和三年章和二年即位十三年

孝和皇帝諱肇肅宗第四子也母梁貴人為竇皇后所
譖憂卒竇后養帝以為己子建初七年立為皇太子章
和二年二月壬辰即皇帝位年十歲尊皇后曰皇太后
太后臨朝三月丁酉改淮陽為陳國楚郡為彭城國西
平并汝南郡六安復為廬江郡遺詔徙西平王羨為陳
王六安王恭為彭城王癸卯葬孝章皇帝於敬陵庚戌
皇太后詔曰皇帝幼年煢煢在疚朕且佐助聽政然守
文之際必有內輔以參聽斷故太尉鄧彪聰明康彊老

成黃耆其以彪為太傅賜爵關內侯錄尚書事百官總
已以聽朕庶幾得專心內位羣公其勉率百僚各修厥
職以稱朕意焉辛酉有司上奏孝章皇帝崇弘鴻業德
化普洽垂意黎民留念稼穡文加殊俗武暢方表戒惟
人面無思不服巍巍蕩蕩莫與比隆周頌曰於穆清廟
肅雝顯相請上尊廟曰肅宗共進武德之舞制曰可癸
亥陳王羨彭城王恭樂成王黨下邳王衍梁王暢始就
國夏四月丙子謁高廟丁丑謁世祖廟戊寅詔曰先帝

探觀孝武皇帝舊典復收鹽鐵之利以備不虞而吏多不良動失其便以違上意先帝恨之故遺戒郡國罷鹽鐵之禁縱民煮鑄入稅縣官如故事其申勅刺史二千石奉順聖旨勉弘德化布告天下使明知朕意五月京師旱詔長樂少府桓郁侍講禁中冬十月乙亥以侍中竇憲為車騎將軍伐北匈奴安息國遣使獻師子扶拔永元元年春三月甲辰初令郎官詔除者得占丞尉以比秩為真夏六月車騎將軍竇憲出雞鹿塞度遼將軍

鄧鴻出柵陽塞南單于出滿夷谷與北匈奴戰於稽落山大破之追至和渠北鞬海竇憲遂登燕然山刻石勒功而還北單于遣弟右溫禺鞬王奉奏貢獻秋七月乙未會稽山崩閏月丙子詔以北虜破碎令有司案舊典告類薦功以章休烈九月庚申以車騎將軍竇憲為大將軍以中郎將劉尚為車騎將軍冬十月令郡國弛刑輸作軍營其徙出塞者刑雖未竟皆免歸田里庚子阜陵王延薨是歲郡國九大水

二年春正月丁丑大救天下二月壬午日有食之己亥
復置西河上郡屬國都尉官夏五月庚戌分太山為濟
北國分樂成涿郡勃海為河間國丙辰封皇帝弟壽為
濟北王開為河間王淑為城陽王紹封故淮南王昞子
側為常山王賜公卿已下至佐史錢布各有差已未遣
副校尉閭贛討北匈奴取伊吾廬地丁卯紹封故齊王
晃子無忌為齊王北海王睦子威為北海王車師前後
王並遣子入侍月氏國遣兵攻西域長史班超超擊降

之六月辛卯中山王馮薨秋七月乙卯大將軍竇憲出屯涼州九月北匈奴遣使稱臣冬十月遣行中郎將班固報命南單于遣左谷蠡王師子出雞鹿塞擊北匈奴於河雲北大破之

三年春二月甲子皇帝加元服賜諸侯王公將軍特進中二千石列侯宗室子孫在京師奉朝請者黃金將大夫郎吏從官帛賜民爵及粟帛各有差大酺五日郡國中都官繫囚死罪贖繚至司寇及亡命各有差庚辰賜

京師民酺布兩戶共一匹二月大將軍竇憲遣左校尉耿夔出居延塞圍北單于於金微山大破之獲其母閼氏夏六月辛卯尊皇太后母比陽公主為長公主辛丑阜陵王种薨冬十月癸未行幸長安詔曰北狄破滅名王仍降西域諸國納質內附豈非祖宗廸哲重光之鴻烈歟寤寐歎息想望舊京其賜所過二千石長吏已下及三老官屬錢帛各有差鰥寡孤獨篤癯貧不能自存者粟人三斛十一月癸卯祠高廟遂有事十一陵詔曰

高祖功臣蕭曹為首有傳世不絕之義曹相國後容城侯無嗣朕望長陵東門見二臣之壠循其遠節每有感焉忠義獲寵古今所同可遣使者以中牢祠大鴻臚求近親宜為嗣者須景風紹封以章厥功十二月復置西域都護騎都尉戊巳校尉官庚辰至自長安減弛刑徒從駕者刑五月

四年春正月北匈奴右谷蠡王於除鞬自立為單于款塞乞降遣大將軍左校尉耿夔授璽綬三月癸丑司徒

表安薨閏月丁丑太常丁鴻為司徒夏四月丙辰大將軍竇憲還至京師六月戊戌朔日有食之丙辰郡國十三地震竇憲潛圖弑逆庚申幸北宮詔收捕憲黨射聲校尉郭璜璜子侍中舉衛尉鄧疊疊弟步兵校尉磊皆下獄死使謁者僕射收憲大將軍印綬遣憲及弟篤景就國到皆自殺是夏旱蝗秋七月己丑太尉宋由坐黨憲自殺八月辛亥司空任隗薨癸丑大司農尹睦為太尉錄尚書事丁巳賜公卿已下至佐史錢穀各有差冬

十月己亥宗正劉方為司空十二月壬辰詔今年郡國秋稼為旱蝗所傷其什四以上勿收田租芻橐有不滿者以實除之武陵零陵澧中蠻叛燒當羌寇金城

五年春正月乙亥宗祀五帝於明堂遂登靈臺望雲物大赦天下戊子千乘王伉薨辛卯封皇弟萬歲為廣宗王二月戊戌詔有司省減內外廐及梁州諸苑馬自京師離宮果園上林廣成圃悉以假貧民恣得采捕不收其稅丁未詔曰去年秋麥入少恐民食不足其上尤貧

不能自給者戶口人數往者郡國上貧民以衣履釜鬻
為貲而豪右得其饒利詔書實數欲有以益之而長吏
不能躬親反更徵召會聚令失農作愁擾百姓若復有
犯者二千石先坐甲寅太傅鄧彪薨戊午隴西地震三
月戊子詔郡國二千石不以選舉為憂司隸校尉不以
糾察為負是以庶官多非其人下民被姦邪之傷由法
不行故也庚寅遣使者分行貧民舉實流冗開倉賑稟
三十餘郡夏四月壬子封阜陵王种兄魴為阜陵王六

月丁酉郡國三雨雹秋九月辛酉廣宗王萬歲薨無子
國除匈奴單于於除鞬叛遣中郎將任尚討滅之壬午
令郡縣勸民蓄蔬食以助五穀其官有陂池令得採取
勿收假稅二歲冬十月辛未太尉尹睦薨十一月乙丑
太僕張酺為太尉是歲武陵郡兵破叛蠻降之護羌校
尉貫友討燒當羌乃遁去南單于安國叛骨都侯喜
斬之

六年春正月永昌徼外夷遣使譯獻犀牛大象己卯司

徒丁鴻薨二月乙未遣謁者分行稟貸三河兗冀青州
貧民許侯馬光自殺丁未司空劉方為司徒太常張奮
為司空三月庚寅詔流民所過郡國皆實稟之其有販
賣者勿出租稅又欲就賤還歸者復一歲田租更賦丙
寅詔以陰陽不和水旱違度其令三公中二千石二千
石內郡守相舉賢良方正能直言極諫之士各一人昭
巖穴披幽隱遣詣公車朕將悉聽焉帝乃親臨策問選
補郎吏夏四月蜀郡徼外羌率種人遣使內附五月城

陽王淑薨無子國除六月己酉初令伏閉盡日秋七月
京師旱詔中都官徒各除半刑謫其未竟五月己下皆
免遣丁巳幸洛陽寺錄囚徒舉寃獄收洛陽令下獄抵
罪司隸校尉河南尹皆左降未及還宮而澍雨西域都
護班超大破焉耆尉犂斬其王自是西域降服納質者
五十餘國南單于安國從弟子逢侯率叛胡亡出塞九
月癸丑以光祿勳鄧鴻行車騎將軍事與越騎校尉馮
柱行度遼將軍朱徽使匈奴中郎將杜崇討之冬十一

月護烏桓校尉任尚率烏桓鮮卑大破逢侯馮柱遣兵追擊獲之詔以渤海郡屬冀州武陵淩中蠻叛郡兵討平之

七年春正月行車騎將軍鄧鴻度遼將軍朱徽中郎將杜崇皆下獄死夏四月辛亥朔日有食之帝引見公卿問得失令將大夫御史謁者博士議郎郎官會廷中各言封事詔有司詳選郎官寬博有謀才任典城者三十人既而悉以所選郎出補長相五月辛卯改千乘國為

樂安國六月丙寅沛王定薨秋七月乙巳易陽地裂九月癸卯京師地震

八年春二月己丑立貴人陰氏為皇后賜天下男子爵人二級三老孝悌力田三級民無名數及流民欲占者一級鰥寡孤獨篤癰貧不能自存者粟人五斛夏四月癸亥樂成王黨薨甲子詔賑貸并州四郡貧民五月河內陳留蝗南匈奴右溫禺犢王叛為寇秋七月行度遼將軍龐奮越騎校尉馮柱追討之斬右溫禺犢王車師

後王叛擊其前王八月辛酉飲酎詔郡國中都官繫囚
減死一等詣敦煌戍其犯大逆募下蠶室其女子宫自
死罪已下至司寇及亡命者入贖各有差九月京師蝗
吏民言事者多歸責有司詔百僚師尹勉修厥職刺史
二千石詳刑辟理冤虐恤鰥寡矜孤弱思惟致災興蝗
之咎庚子復置廣陽郡冬十月乙丑北海王威有罪自
殺十二月辛亥陳王羨薨丁巳南宮宣室殿火

九年春正月永昌徼外蠻夷及揮國重譯奉貢三月庚

辰隴西地震癸巳濟南王康薨西域長史王林擊車師
後王斬之夏四月丁卯封樂成王黨子巡為樂成王六
月蝗旱戊辰詔今年秋稼為蝗蟲所傷皆勿收租更芻
橐若有所損失以實除之餘當收租者亦半入其山林
饒利陂池漁採以贍元元勿收假稅秋七月蝗蟲飛過
京師八月鮮卑寇肥如遼東太守祭參下獄死閏月辛
巳皇太后竇氏崩丙申葬章德皇后燒當羌寇隴西殺
長吏遣行征西將軍劉尚越騎校尉趙世等討破之九

月庚申司徒劉方策免自殺甲子追尊皇妣梁貴人為
皇太后冬十月乙酉改葬恭懷梁皇后於西陵十一月
癸卯光祿勳河南呂蓋為司徒十二月丙寅司空張奮
罷壬申太僕韓稜為司空己丑復置若盧獄官

十年春三月壬戌詔刺史二千石隨宜疏導溝渠毋得
因緣妄發以為煩擾夏五月京師大水秋七月己巳司
空韓稜薨八月丙子太常太山巢堪為司空九月庚戌
復置廩犧官冬十月五州雨水十二月燒當羌豪迷唐

等率種人詣闕貢獻戊寅梁王暢薨

十一年春二月遣使循行郡國稟貸被災害不能自存者令得漁采山林池澤不收假稅丙午詔郡國中都官徒及篤癰老小女徒各除半刑其未竟三月者皆免歸田里夏四月丙寅大赦天下己巳復置右校尉官秋七月辛卯詔以吏民踰僭厚死傷生有司不舉怠放日甚又商賈小民或忘法禁竒巧靡貨流積公行其在位犯者當先舉正市道小民但且申明憲網勿因科令加虐

羸弱

十二年春二月旄牛徼外白狼騶薄夷率種人內屬詔
貸被災諸郡民種糧賜下貧鰥寡孤獨不能自存者及
郡國流民聽入陂池漁采以助蔬食三月丙申詔書切
責三公不能承天安人有司競為苛暴侵愁小民將何
以救咎罰其賜天下男子爵人二級三老孝悌力田三
級民無名數及流民欲占者人一級鰥寡孤獨篤癯貧
不能自存者粟人三斛壬子賜博士員弟子在太學者

布人三匹夏四月日南象林蠻夷反郡兵討破之閏月
賑貸敦煌張掖五原民下貧者穀戊辰秭歸山崩六月
舞陽大水賜被水災尤貧者穀人三斛秋七月辛亥朔
日有食之九月戊午太尉張酺免丙寅大司農張禹為
太尉冬十一月西域蒙奇兜勒二國遣使內附賜其王
金印紫綬是歲燒當羌復叛

十三年春正月丁丑帝幸東觀覽書林閱篇籍博選術
藝之士以充其官二月任城王尚薨丙午賑貸張掖居

延朔南日南貧民及孤寡羸弱不能自存者秋八月詔
象林民失農桑業者賑貸種糧稟賜下貧穀食己亥北
宮盛饌門閣火護羌校尉周鮪擊燒當羌破之荊州雨
水九月壬子詔曰荊州比歲不節今茲淫水為害餘雖
頗登而多不均浹深惟四民農食之本慘然懷矜其令
天下半入今年田租芻藁有宜以實除者如故事貧民
假種食皆勿收責冬十一月安息國遣使獻師子及條
枝大爵丙辰詔曰幽并涼州戶口率少邊役衆劇東修

良吏進仕路狹撫接夷狄以人為本其令緣邊郡口十萬以上歲舉孝廉一人不滿十萬二歲舉一人五萬以下三歲舉一人鮮卑寇右北平遂入漁陽漁陽太守擊破之戊辰司徒呂蓋罷十二月丁丑光祿勳魯恭為司徒辛卯巫蠻叛寇南郡

十四年春二月乙卯東海王政薨繕修故海西郡徙金城西部都尉以戌之三月戊辰臨辟雍饗射大赦天下夏四月遣使者督荊州兵討巫蠻破降之庚辰賑貸張

掖居延敦煌五原漢陽會稽流民下貧穀各有差五月
丁未初置象林將兵長史官六月辛卯廢皇后陰氏后
父特進綱自殺秋七月甲寅詔復象林縣更賦田租芻
橐二歲壬子常山王側薨是秋三州雨水冬十月甲申
詔充豫荊州今年雨水淫過多傷農功其令被害什四
以上皆半入田租芻橐其不滿者以實除之辛丑立貴
人鄧氏為皇后丁酉司空巢堪罷十一月癸卯大司農
徐防為司空是歲初復郡國上計補郎官

十五年春閏月乙未詔流民欲歸還本而無糧食者過所實稟之疾病加致醫藥其不欲還歸者勿彊二月詔稟貸潁川汝南陳留江夏梁國敦煌貧民夏四月甲子晦日有食之五月戊寅南陽大風六月詔令百姓鰥寡漁采陂池勿收假稅二歲秋七月丙寅濟南王錯薨復置涿郡故鹽鐵官九月壬午南巡狩清河王慶濟北王壽河間王開並從賜所過二千石長吏以下三老官屬及民百年者錢布各有差是秋四州雨水冬十一月戊

申幸章陵祠舊宅癸丑祠園廟會宗室於舊廬勞賜作樂戊午進幸雲夢臨漢水而還十一月甲申車駕還宮賜從臣及留者公卿已下錢布各有差十二月庚子琅邪王宇薨有司奏以為夏至則微陰起靡草死可以決小事是歲初令郡國以日北至案薄刑

十六年春正月己卯詔貧民有田業而以匱乏不能自農者貸種糧二月己未詔兗豫徐冀四州比年雨多傷稼禁酤酒夏四月遣三府掾分行四州貧民無以耕者

為雇犂牛直五月壬午趙王商薨秋七月旱戊午詔曰
今秋稼方穗而旱雲雨不霑疑吏行慘刻不宣恩澤妄
拘無罪幽閉良善所致其一切囚徒於法疑者勿決以
奉秋令方察煩苛之吏顯明其罰辛酉司徒魯恭免庚
午光祿勳張酺為司徒辛巳詔令天下皆半入今年田
租芻橐其被災害者以實除之貧民受貸種糧及田租
芻橐皆勿收責八月己酉司徒張酺薨冬十月辛卯司
空徐防為司徒大鴻臚陳寵為司空十一月己丑行幸

縵氏登百岨山賜百官從臣布各有差北匈奴遣使稱臣貢獻十二月復置遼東西部都尉官

元興元年春正月戊午引三署郎召見禁中選除七十人補謁者長相高句驪寇郡界夏四月庚午大赦天下改元元興宗室以罪絕者悉復屬籍五月癸酉雍地裂秋九月遼東太守耿夔擊貊人破之冬十二月辛未帝崩于章德前殿年二十七立皇子隆為皇太子賜天下男子爵人三級三老孝悌力田人三級民無名數及

流民欲占者人一級鰥寡孤獨篤癯貧不能自存者粟人三斛自實憲誅後帝躬親萬機每有災異輒延問公卿極言得失前後符瑞八十一所每稱德薄皆抑而不宣舊南海獻龍眼荔枝十里一置五里一候奔騰阻險死者繼路時臨武長汝南唐羌縣接南海乃上書陳狀帝下詔曰遠國珍羞本以薦奉宗廟苟有傷害豈愛民之本其勅太官勿復受獻由是遂省焉

和帝永元十六年元興元年即位十七年

孝殤皇帝諱隆和帝少子也元興元年十二月辛未夜
帝即皇帝位時誕育百餘日尊皇后曰皇太后太后臨
朝北匈奴遣使稱臣詣敦煌奉獻

延平元年春正月辛卯太尉張禹為太傅司徒徐防為
太尉參錄尚書事百官總已以聽封皇兄勝為平原王
癸卯光祿勳梁鮪為司徒三月甲申葬孝和皇帝于慎
陵尊廟曰穆宗丙戌清河王慶濟北王壽河間王開常
山王章始就國夏四月庚申詔罷祀官不在祀典者鮮

卑寇漁陽漁陽太守張顯追擊戰歿丙寅以虎賁中郎將鄧騭為車騎將軍司空陳寵薨五月辛卯皇太后詔曰皇帝幼冲承統鴻業朕且佐助聽政嘉與吏民更始其大救天下自建武以來諸犯禁錮詔書雖解有司持重多不奉行其皆復為平民壬辰河東垣山崩六月丁未太常尹勤為司空郡國三十七雨水己未詔減太官導官尚方內署諸服御珍膳靡麗難成之物丁卯詔司徒大司農長樂少府曰朕深惟治道先內後外自建武

之初以至于今八十餘年宮人歲增房御彌廣又宗室坐事沒入者猶託名公族甚可愍焉今悉免遣及掖庭宮人皆為庶民以紓幽隔鬱滯之情諸官府郡國王侯家奴婢姓劉及疲癯羸老皆上其名務令實悉秋七月庚寅勅司隸校尉部刺史曰夫天降災戾應政而至間者郡國或有水災妨害秋稼朝廷惟咎憂惶悼懼而郡國欲獲豐穰虛飾之譽遂覆蔽災害多張墾田不揣流亡競增戶口掩匿盜賊令姦惡無懲署用非次選舉乖

宜貪苛慘毒延及平民刺史垂頭塞耳阿私下比不畏
于天不愧于人假貸之恩不可數恃自今以後將糾其
罰二千石長吏其各實覈所傷害為除田租芻橐八月
辛亥帝崩癸丑殯于崇德前殿年二歲

殤帝延平一年

恭宗孝安皇帝諱祐肅宗孫也父清河孝王慶母左姬
帝自在邸第數有神光照室又有赤蛇盤於牀第之間
年十歲好讀史書和帝稱之數見禁中延平元年慶始

就國鄧太后特詔留帝清河邸八月殤帝崩太后與兄
車騎將軍鄧騭定策禁中其夜使騭持節以王青蓋車
迎帝齋于殿中皇太后御崇德殿百官皆吉服羣臣陪
位引拜帝為長安侯皇太后詔曰先帝聖德淑茂早棄
天下朕奉皇帝夙夜瞻仰日月冀望成就豈意卒然顛
沛天年不遂悲痛斷心朕深惟平原王素被痼疾念宗
廟之重思繼嗣之統唯長安侯祐質性忠孝小心翼翼
能通詩論篤學樂古仁惠愛下年已十三有成人之志

親德係後莫宜於祐禮昆弟之子猶已子春秋之義為人後者為之子不以父命辭王父命其以祐為孝和皇帝嗣奉承祖宗案禮儀奏又作策命曰惟延平元卒秋八月癸丑皇太后曰咨長安侯祐孝和皇帝懿德巍巍光于四海大行皇帝不永天命朕惟侯孝章帝世嫡皇孫謙恭慈順在孺而勤宜奉郊廟承統大業今以侯嗣孝和皇帝後其審君漢國允執其中一人有慶萬民賴之皇帝其勉之哉讀策畢太尉奉上璽綬即皇帝位年

十三太后猶臨朝九月庚子謁高廟辛丑謁光武廟六
州大水己未遣謁者分行虛實舉災害賑乏絕丙寅葬
孝殤皇帝于康陵乙亥隕石于陳留西域諸國叛攻都
護任尚遣副校尉梁懂救尚擊破之冬十月四州大水
雨雹詔以宿麥不下賑賜貧人十二月甲子清河王薨
使司空持節弔祭車騎將軍鄧騭護喪事乙酉罷魚龍
曼延百戲

永初元年春正月癸酉朔大赦天下蜀郡徼外羌內屬

戊寅分犍為南部為屬國都尉稟司隸充豫徐冀并州
貧民三月丙午以廣成游獵地及被災郡國公田假與
貧民丁卯分清河國封帝弟常保為廣川王庚午司徒
梁鮪薨三月癸酉日有食之詔公卿內外衆官郡國守
相舉賢良方正有道術之士明政術達古今能直言極
諫者各一人己卯永昌徼外僬僥種夷貢獻內屬甲申
葬清河孝王贈龍旗虎賁夏五月甲戌長樂衛尉魯恭
為司徒丁丑詔封北海王睦孫壽光侯普為北海王九

真徼外夜郎蠻夷舉土內屬六月戊申爵皇太后母陰氏為新野君丁巳河東地陷壬戌罷西域都護先零種羌叛斷隴道大為寇掠遣車騎將軍鄧騭征西校尉任尚討之丁卯赦除諸羌相連結謀叛逆者罪秋九月庚午詔三公明申舊令禁奢侈無作浮巧之物殫財厚葬是日太尉徐防免辛未司空尹勤免癸酉調揚州五郡租米贍給東郡濟陰陳留梁國下邳山陽丁丑詔曰自今長吏被考竟未報自非父母喪無故輒去職者劇縣

十歲平縣五歲以上乃得次用壬午詔太僕少府減黃
門鼓吹以補羽林士廐馬非乘輿常所御者皆減半食
諸所造作非供宗廟園陵之用皆且止丙戌詔死罪以
下及亡命贖各有差庚寅太傅張禹為太尉太常周章
為司空冬十月倭國遣使奉獻辛酉新城山泉水大出
十一月丁亥司空周章密謀廢立策免自殺戊子勅司
隸校尉冀并二州刺史民訛言相驚棄捐舊居老弱相
攜窮困道路其各勅所部長吏躬親曉諭若欲歸本郡

在所為封長檄不欲勿強十二月乙卯潁川太守張敏
為司空是歲郡國十八地震四十一雨水或山水暴至
二十八風雨雹

二年春正月稟河南下邳東萊河內貧民車騎大將軍
鄧騭為種羌所敗於冀西二月乙丑遣光祿大夫樊準
呂倉分行冀兗二州稟貸流民夏四月甲寅漢陽城中
火燒殺三千五百七十人五月旱丙寅皇太后幸洛陽
寺及若盧獄錄囚徒賜河內尹廷尉卿及官屬以下各

有差即日降雨六月京師及郡國四十大水大風雨雹
秋七月戊辰詔百僚及郡國吏民有道術明習災異陰
陽之度璇璣之數者各使指變以聞二千石長吏明以
詔書博衍幽隱朕將親覽待以不次冀獲嘉謀以承天
誠閏月辛丑廣川王常保薨無子國除癸未蜀郡徵外
羌舉土內屬九月庚子詔王主官屬墨綬下至郎謁者
其經明任博士居鄉里有廉清孝順之稱才任理人者
國相歲移名與計偕上尚書公府通調令得外補冬十

月庚寅稟濟陰山陽元菟貧民征西校尉任尚與先零
羌戰于平襄尚軍敗績十一月辛酉拜鄧騭為大將軍
徵還京師留任尚屯隴右先零羌滇零稱天子於北地
遂寇三輔東犯趙魏南入益州殺漢中太守董炳十二
月辛卯稟東郡鉅鹿廣陽安定定襄沛國貧民廣漢塞
外參狼羌降分廣漢北部為屬國都尉是歲郡國十二
地震

三年春正月庚子皇帝加元服大赦天下賜王主貴人

公卿以下金帛各有差男子為父後及三老孝悌力田
爵人二級流民欲占者人一級遣騎都尉任仁討先零
羌不利遂破沒臨洮高句驪遣使貢獻三月京師大饑
民相食壬辰公卿詣闕謝詔曰朕以幼冲奉承鴻業不
能宣流風化而感逆陰陽至今百姓饑荒更相噉食永
懷悼歎若墜淵水咎在朕躬非羣司之責而過自貶引
重朝廷之不德其務思變復以助不逮癸巳詔以鴻池
假與貧民壬寅司徒魯恭免夏四月丙寅大鴻臚九江

夏勤為司徒三公以國用不足奏令吏民入錢穀得為
關內侯虎賁羽林郎五大夫官府吏緹騎營士各有差
已巳詔上林廣城苑可墾闢者賦與貧民甲申清河王
虎威薨五月丙申封樂安王寵子延平為清河王丁酉
沛王正薨癸丑京師大風六月烏桓寇代郡上谷涿郡
秋七月海賊張伯路等寇略緣海九郡遣侍御史龐雄
督州郡兵討破之庚子詔長吏案行在所皆令種粟麥
疏食務盡地力其貧者給種餉九月鴈門烏桓及鮮卑

叛敗五原郡兵於高渠谷冬十月南單于叛圍中郎將耿仲於美稷十一月遣行車騎將軍何熙討之十二月辛酉郡國九地震乙亥有星孛於天紀是歲京師及郡國四十一雨水雹并涼二州大饑人相食

四年春正月元日會徹樂不陳充庭車辛卯詔以三輔比遭寇亂人庶流冗除三年逋租過更口算芻橐橐上郡貧民各有差海賊張伯路復與勃海平原劇賊劉文河周文光等攻厭次殺縣令遣御史中丞王宗督青州

刺史法雄討破之度遼將軍梁懂遼東太守耿夔討破
南單于於屬國故城丙午詔減百官及州郡縣奉各有
差二月丁巳稟九江貧民南匈奴寇常山乙丑初置長
安雍二營都尉官乙亥詔自建初以來諸妖言他過坐
徙邊者各歸本郡其沒入官為奴婢者免為庶人詔謁
者劉珍及五經博士校定東觀五經諸子傳記百家藝
術整齊脫誤是正文字三月南單于降先零羌寇襄中
漢中太守鄭勤戰歿徙金城郡都襄武戊子杜陵園火

癸巳郡國九地震夏四月六州蝗丁丑大赦天下秋七月乙酉三郡大水巳卯騎都尉任仁下獄死九月甲申益州郡地震冬十月甲戌新野君陰氏薨使司空持節護喪事大將軍鄧騭罷

五年春正月庚辰朔日有食之丙戌郡國十地震巳丑太尉張禹免甲申光祿勳李修為太尉二月丁卯詔省減郡國貢獻太官口食先零羌寇河東遂至河內三月詔隴西徙襄武安定徙美陽北地徙池陽上郡徙衙夫

餘夷犯塞殺傷吏人閏月丁酉赦涼州河西四郡戍戍
詔令三公特進侯中二千石二千石郡守諸侯相舉賢
良方正有道術達於政化能直言極諫之士各一人及
至孝與衆卓異者并遣詣公車朕將親覽以毗闕政焉
六月甲辰樂成王巡薨秋七月己巳詔三公特進九卿
校尉舉列將子孫明曉戰陣任將帥者九月漢陽人杜
琦王信叛與先零諸種羌攻陷上邽城十二月漢陽太
守趙博遣客刺殺杜琦是歲九州蝗郡國八雨水

六年春正月庚申詔越雋置長利高望始昌三苑又令益州郡置萬歲苑犍為置漢平苑三月十州蝗夏四月乙丑司空張敏罷己卯太常劉愷為司空五月旱丙寅詔令中二千石下至黃綬一切復秩還贖賜爵各有差戊辰皇太后幸雒陽寺錄囚徒理寃獄六月壬辰豫章負谿原山崩辛巳大赦天下遣侍御史唐喜討漢陽賊王信破斬之冬十一月辛丑護烏桓校尉吳祉下獄死是歲先零羌滇零死子零昌復襲偽號

七年春正月庚戌皇太后率大臣命婦謁宗廟二月丙午郡國十八地震夏四月乙未平原王勝薨丙申晦日有食之五月庚子京師大雩秋護羌校尉侯霸騎都尉馬賢破先零羌八月丙寅京師大風蝗蟲飛過洛陽詔賜民爵郡國被蝗傷稼十五以上勿收今年田租不滿者以實除之九月調零陵桂陽丹陽豫章會稽租米賑給南陽廣陵下邳彭城山陽廬江九江饑民又調濱水縣穀輸教倉

元初元年春正月甲子改元元初賜民爵人二級孝悌
力田人三級爵過公乘得移與子若同產同產子民脫
無名數及流民欲占者人一級鰥寡孤獨篤癯貧不能
自存者粟人三斛貞婦帛人一匹二月己卯日南地圻
三月癸酉日有食之夏四月丁酉大赦天下京師及郡
國五旱蝗詔三公特進列侯中二千石二千石郡守舉
敦厚質直者各一人五月先零羌寇雍城六月丁巳河
東地陷秋七月蜀郡夷寇蠶陵殺縣令九月己丑太尉

李修罷先零羌寇武都漢中絕隴道辛未大司農山陽
司馬苞為太尉冬十月戊子朔日有食之先零羌敗涼
州刺史皮陽於狄道乙卯詔除三輔三歲田租更賦口
算十一月是歲郡國十五地震

二年春正月詔稟三輔及并涼六郡流冗貧人蜀郡青
衣道夷奉獻內屬修理西門豹所分漳水為支渠以溉
民田二月戊戌遣中謁者收葬京師客死無家屬及棺
槨朽敗者皆為設祭其有家屬尤貧無以葬者賜錢人

五千辛酉詔三輔河內河東上黨趙國太原各修理舊
渠通利水道以溉公私田疇三月癸亥京師大風先零
羌寇益州遣中郎將尹就討之夏四月丙午立貴人閻
氏為皇后五月京師旱河南及郡國十九蝗甲戌詔切
責三司不能消救災眚以時方盛夏且復假貸以觀厥
後六月丙戌太尉司馬芑薨洛陽新城地裂秋七月辛
巳太僕太山馬英為太尉八月遼東鮮卑圍無慮縣九
月又攻夫犂營殺縣令壬午晦日有食之冬十月遣中

郎將任尚屯三輔詔郡國中都官繫囚減死一等勿笞
詣馮翊扶風屯妻子自隨占著所在女子勿輸亡命死
臯以下贖各有差其吏民聚為盜賊有悔者除其罪乙
未右扶風仲光安定太守杜恢京兆虎牙都尉耿溥與
先零羌戰於丁奚城光等大敗並沒左馮翊司馬鈞下
獄自殺十一月庚申郡國十地震十二月武陵澧中蠻
叛州郡擊破之己酉司徒夏勤罷庚戌司空劉愷為司
徒光祿勳袁敞為司空

三年春正月甲戌修理太原舊溝渠灌溉官私田東平
陸上言木連理蒼梧鬱林合浦蠻夷反叛二月遣侍御
史任連督州郡兵討之郡國十地震三月辛亥日有食
之丙辰赦蒼梧鬱林合浦南海吏民為賊所迫者夏四
月京師旱五月武陵蠻叛州郡討破之癸酉度遼將軍
鄧遵率南匈奴擊先零羌於靈州破之越雋徼外夷舉
種內屬六月中郎將任尚遣兵擊破先零羌於丁奚城
秋七月武陵蠻復叛州郡討平之緄氏地圻九月辛巳

趙王宏薨冬十一月蒼梧鬱林合浦蠻夷降丙戌初聽大臣二千石刺史行三年喪癸卯郡國九地震十二月丁巳任尚遣兵擊破先零羌於北地

四年春二月乙巳朔日有食之乙卯大赦天下壬戌武庫災夏四月戊申司空袁敞薨己巳鮮卑寇遼西郡兵與烏桓擊破之五月丁丑太常李郃為司空六月戊辰三郡雨雹秋七月辛丑陳王鈞薨京師及郡國十雨水詔曰夫霖雨者人怨之所致凡吏有苛虐為百姓所患

苦者有司顯明其罰又月令仲秋養衰老授几杖行糜粥方今案比之時郡縣多不奉行雖有糜粥糠粃相半長吏怠事莫肯躬親甚違詔書養老之意其務崇仁恕賑護寡獨稱朕意焉九月護羌校尉任尚使客刺殺叛羌零昌冬十一月己卯彭城王恭薨十二月越嶲夷寇遂久殺縣令甲子任尚及騎都尉馬賢與先零羌戰于富平上河大破之度人羌率衆降隴右平是歲郡國十三地震

五年春正月越雋夷叛二月壬戌中山憲王薨三月京師及郡國五旱詔稟遭旱貧人夏六月高句驪與濊貊寇元菟秋七月越雋蠻夷及旄牛豪叛殺長吏丙子詔曰舊令制度各有科品今小人不務崇節約嫁娶送終紛華靡麗至有走卒奴婢被綺縠著珠璣京師尚若斯何以示四遠設張法禁懇惻分明而有司情任訖不奉行秋節既立鷙鳥將用且復重申以觀後效八月丙申朔日有食之鮮卑寇代郡殺長吏冬十月鮮卑寇上谷

十二月丁巳中郎將任尚有臯棄市是歲郡國十四地震

六年春二月乙巳京師及郡國四十二地震或圻裂水泉涌出壬子詔三府選掾屬高第能惠利牧養者各五人光祿勲與中郎將選孝廉郎寬博有謀清白行高者五十人出補令長丞尉乙卯詔賜京師尤貧困孤弱單獨穀人三斛貞婦有節義十斛甄表門閭旌顯厥行三月庚辰始立六宗祀於洛城西北夏四月會稽大疫遣

光祿大夫將太醫循行疾病賜棺木除田租口賦沛國
勃海大風雨雹五月京師旱六月丁丑樂成王賓薨丙
戌平原王得薨秋七月鮮卑寇馬城度遼將軍鄧遵率
南單于擊破之九月癸巳陳王竦薨十二月戊午朔日
有食之既郡國八地震是歲永昌益州蜀郡夷叛與越
雋夷殺長吏燔城邑益州刺史張喬討破降之

永寧元年春正月甲辰任城王安薨三月丁酉濟北王
壽薨車師後王叛殺部司馬沈氏羌寇張掖夏四月丙

寅立皇子保為皇太子改元永寧大赦天下賜王主三公列侯下至郎吏從官金帛又賜民爵及布粟各有差已已詔封陳王羨子崇為陳王濟北王子萇為樂成王河間王子翼為平原王壬午琅邪王壽薨六月沈氏種羌叛寇張掖護羌校尉馬賢討沈氏羌破之秋七月乙酉朔日有食之冬十月已巳司空李郃免癸酉衛尉廬江陳襲為司空自三月至是月京師及郡國三十三大風雨水十二月永昌徼外捍國遣使貢獻戊辰司徒劉

愷罷遼西鮮卑降癸酉太常楊震為司徒是歲郡國二十三地震夫餘王遣子詣闕貢獻燒當羌叛

建光元年春正月幽州刺史馮煥率二郡太守討高句驪濊貊不剋二月癸亥大赦天下賜諸園貴人王主公卿以下錢布各有差以公卿校尉尚書子弟一人為郎舍人三月癸巳皇太后鄧氏崩丙午葬和熹皇后丁未樂安王寵薨戊申追尊皇考清河孝王曰孝德皇皇妣左氏曰孝德皇后祖妣宋貴人曰敬隱皇后夏四月濊

貊復與鮮卑寇遼東遼東太守蔡諷追擊戰歿丙辰以
廣川并清河國丁巳尊孝德皇元妃耿氏為甘陵大貴
人甲子樂成王莢有罪廢為臨湖侯巳巳令公卿特進
侯中二千石二千石郡國守相舉有道之士各一人賜
鰥寡孤獨貧不能自存者穀人三斛甲戌遼東屬國都
尉龐奮承偽璽書殺元菟太守姚光五月特進鄧騭及
度遼將軍鄧遵並以譖自殺丙申貶平原王翼為都鄉
侯秋七月巳卯改元建光大赦天下壬寅太尉馬英薨

八月護羌校尉馬賢討燒當羌於金城不利甲子前司徒劉愷為太尉鮮卑寇居庸關九月雲中太守成嚴擊之戰歿鮮卑圍烏桓校尉於馬城度遼將軍耿种救之戊子幸衛尉馮石府是秋京師及郡國二十九雨水冬十一月己丑郡國三十五地震或圻裂詔三公已下各上封事陳得失遣光祿大夫案行賜死者錢人二千除今年田租其被災甚者勿收口賦鮮卑寇元菟庚子復斷大臣二千石以上服三年喪癸卯詔三公特進侯卿

校尉舉武猛堪將帥者各五人丙午詔京師及郡國被
水雨傷稼者隨頃畝減田租甲子初置漁陽營兵冬十
二月高句驪馬韓濊貊圍元菟城夫餘王遣子與州郡
并力討破之

延光元年春二月夫餘王遣子將兵救元菟擊高句驪
馬韓濊貊破之遂遣使貢獻三月丙午改元延光大赦
天下還徙者復戶邑屬籍賜民爵及三老孝悌力田人
二級加賜鰥寡孤獨篤癰貧不能自存者粟人三斛貞

婦帛人二匹夏四月癸未京師郡國二十一雨雹癸巳
司空陳襄免五月庚戌宗正彭城劉授為司空己巳改
樂成國為安平封河間王開子得為安平王六月郡國
蝗秋七月癸卯京師及郡國十三地震高句驪降度人
羌叛攻穀羅城度遼將軍耿夔討破之八月戊子陽陵
園寢火辛卯九真言黃龍見無功己亥詔三公中二千
石舉刺史二千石令長相視事一歲已上至十歲清白
愛利能勅身率下防姦理煩有益於人者無拘官簿刺

史舉所部郡國太守相舉墨綬隱親悉心勿取浮華九月甲戌郡國二十七地震冬十月鮮卑寇鴈門定襄十一月鮮卑寇太原燒當羌豪降十二月九真徼外蠻夷貢獻內屬是歲京師及郡國二十七雨水大風殺人詔賜壓溺死者年七歲以上錢二千其壞敗廬舍失亡穀食粟人三斛又田被淹蕩者一切勿收田租若一家皆被災害而弱小存者郡縣為收斂之度人羌反攻穀羅城度遼將軍耿夔討破之

二年春正月旄牛夷叛寇靈關殺縣令益州刺史蜀郡
西部都尉討之詔選三署郎及吏民能通古文尚書毛
詩穀梁春秋各一人丙辰河東潁川大風夏六月壬午
郡國十一大風九真言嘉禾生丙申北海王普薨秋七
月丹陽山崩八月庚午初令三署郎通達經術任牧民
者視事三歲以上皆得察舉九月郡國五雨水冬十月
辛未太尉劉愷罷甲戌司徒楊震為太尉光祿勳東萊
劉憲為司徒十一月甲辰校獵於上林苑鮮卑敗南匈奴

奴於曼栢是歲分蜀郡西部為屬國都尉京師及郡國
三地震

三年春二月丙子東巡狩丁丑告陳留太守祠南頓君
光武皇帝于濟陽復濟陽今年田租芻橐庚寅遣使者
祠唐堯於成陽戊子濟南上言鳳凰集臺縣丞霍牧舍
樹上賜臺長帛五十匹丞三十匹尉半之吏卒人三匹
鳳凰所過亭郡無出今年田租賜男子爵人二級辛卯
幸太山柴告岱宗齊王無忌北海王普樂安王延來朝

壬辰宗祀五帝于汶上明堂癸巳告祀二祖六宗勞賜
郡縣作樂三月甲午陳王崇薨戊戌祀孔子及七十二
弟子於闕里自魯相令丞尉及孔氏親屬婦女諸生悉
會賜褒成侯以下帛各有差還幸東平至東郡歷魏郡
河內壬戌車駕還京師幸太學是日太尉楊震免夏四
月乙丑車駕入宮假于祖禰壬戌沛國言甘露降豐縣
戊辰光祿勳馮石為太尉五月南匈奴左日逐王叛使
匈奴中郎將馬翼討破之日南徼外蠻夷內屬六月鮮

卑寇元菟庚午閏中山崩辛未扶風言白鹿見雍辛巳
遣侍御史分行青冀二州災害督錄盜賊秋七月丁酉
初復右校令左校丞官日南徼外蠻豪帥詣闕貢獻馮
翊言甘露降頻陽衙潁川上言木連理白鹿麒麟見陽
翟鮮卑寇高柳梁王堅薨八月辛巳大鴻臚耿寶為大
將軍戊子潁川上言麒麟一白虎二見陽翟九月丁酉
廢皇太子保為濟陰王乙巳詔郡國中都官死辜繫囚
減罪一等詣敦煌隴西及度遼營其右趾以下及亡命

者贖各有差辛亥濟南上言黃龍見歷城庚申晦日有
食之冬十月行幸長安壬午新豐上言鳳凰集西界亭
丁亥會三輔守令掾史於長安作樂閏月乙未祠高廟
遂有事十一陵歷觀上林昆明池遣使者祠太上皇于
萬年以中牢祠蕭何曹參霍光十一月乙丑至自長安
十二月乙未琅邪言黃龍見諸縣是歲京師及諸郡國
二十三地震三十六雨水疾風雨雹

四年春正月壬午東郡言黃龍二麒麟一見濮陽二月

乙亥下邳王衍薨甲辰南巡狩三月戊午朔日有食之
庚申幸宛帝不豫辛酉令大將軍耿寶行太尉事祠章
陵園廟告長沙零陵太守祠定王節侯鬱林府君乙丑
自宛還丁卯幸葉帝崩于乘輿年三十二祕不敢宣所
在上食問起居如故庚午還宮辛未夕乃發喪尊皇后
曰太后太后臨朝以后兄大鴻臚閭顯為車騎將軍定
策禁中立章帝孫濟北惠王壽子北鄉侯懿甲戌濟南
王香薨乙酉北鄉侯即皇帝位夏四月丁酉太尉馮石

為太傅司徒劉熹為太尉參錄尚書事前司空李邵為
司徒辛卯大將軍耿寶中常侍樊豐侍中謝暉周廣乳
母野王君王聖坐相阿黨豐暉廣下獄死寶自殺聖徙
鴈門己酉葬孝安皇帝于恭陵廟曰恭宗六月乙巳大
赦天下詔先帝巡狩所幸皆半入今年田租秋七月西
域長史班勇擊車師後王斬之丙午東海王肅薨冬十
月丙午越嶲山崩辛亥少帝薨是冬京師大疫范氏論
曰孝安雖稱尊享御而權歸鄧氏至乃損徹膳服克念

政道然令自房帷威不逮遠始失根統歸成陵敝遂復
計金授官移民逃寇推咎台衡以答天眚既云哲婦亦
惟家之索矣

安帝永初七年元初六年永寧元年建光元年延
光四年即位十九年

通志卷六上